

摘藻堂四庫全書薈要

集部

欽定四庫全書薈要

集部

施註蘇詩卷九

十

詳校官助教臣常循



欽定四庫全書薈要卷一萬四千九百六十

集部

施註蘇詩卷九

宋 蘇軾 撰

宋 施元之 註

武進邵長蘅刪補

詩六十五首

起自常潤復還杭州尋去杭之密州任作施註缺今補

無錫道中賦水車

翻翻聯聯銜尾鴉  
犖犖确确蛻骨蛇  
分疇翠浪走雲陣  
刺水綠鍼抽稻芽  
洞庭五月欲飛沙  
鼉鳴窟中如打衙

天公不見老翁

一作農

泣喚取阿香推雷車

江浙間人目水車為龍骨車晉安海物記鼃宵鳴如桴鼓今江淮間謂鼃鳴為鼃更埤雅鼃欲雨則鳴搜神記晉永和中有人日暮寄宿草屋惟一女子居之夜半門外呼曰阿香官喚汝推雷車至曉雷雨作視其門乃大塚也

杭州牡丹開時僕猶在常潤周令作詩見寄次其韻復次一首送赴闕

羞歸應為負花期已見成陰結子時與物寡情憐我老  
遣春無恨賴君詩玉臺不見朝酣酒金縷猶歌空折枝



從此年年定相見欲師老圃問樊遲

杜牧之詩自是尋春去較遲不須惆悵怨芳時狂風落盡深紅色綠葉成陰子滿枝朝酣酒用李正封句注再見杜牧之序杜秋娘金陵女也年十五為李錡妾嘗唱詞云勸君莫惜金縷衣勸君須惜少年時花開堪折直須折莫待無花空折枝

莫負黃花九日期人生窮達可無時十年且就三都賦萬戶終輕千首詩天靜傷鴻猶戢翼月明驚鵲未安枝君看六月河無水萬斛龍驤到自遲

晉左思欲賦三都乃詣著作郎張載訪岷邛之事遂構思十年門庭藩閫皆置紙筆過得一句即便疏之自以

所見不博求為秘書郎及賦成競相傳寫都城為之紙  
貴杜牧之寄張祐詩誰人得似張公子千首詩輕萬戶  
侯傷鴻暗用國策虛弦事注見三卷廣陵會三同舍製  
武樂府月明星稀烏鵲南飛遠樹三匝無枝可依龍驤  
注見八卷大

風留金山

蘇州間丘江君二家雨中飲酒二首

間丘孝忠  
字公顯

小圃陰陰徧灑塵方塘潏潏欲生紋已煩仙袂來行雨  
莫遣歌聲便駐雲肯對綺羅辭白酒試將文字惱紅裙  
今宵記取醒時節點滴空堦獨自聞

唐咸通末淮南李公遊江舟子刺船誤潏水濕侍女衣  
公變色裴慶餘時佐幕在坐遽獻一絕云半額鵝黃金

縷衣翠翹浮動玉釵垂從教水濺羅襦濕疑是巫山行  
雨歸李為之霽顏列子薛談學謳於秦青未窮青之技  
遂辭歸青弗止餞於郊撫節悲歌聲振林木響遏行雲  
謠乃反不敢言歸李白詩白酒初熟山中歸古詩夜雨  
滴空堦滴空堦裏空堦滴不入滴入愁人耳

五紀歸來鬢未霜十眉環列坐生光喚船渡口迎秋女  
駐馬橋邊問泰娘曾把四絃娛白傅敢將百草鬪吳王  
從今卻笑風流守畫戟空凝宴寢香

唐明皇幸蜀令畫工作十眉圖杜牧秋娘詩卻喚吳江  
渡舟人那得知劉禹錫泰娘詩有時裝成好天氣走上  
臯橋折花戲風流太守韋尚書路傍忽見停隼旗白居  
易琵琶行詳第八卷古纏頭曲王注吳王與西施作門

百草之戲韋應物詩兵  
衛森畫戟宴寢凝清香

次韻沈長官三首

家山何在兩忘歸杯酒相逢慎勿違不獨飯山嘲我瘦  
也應糠覈怪君肥

李白詩飯顆山前逢杜甫頭戴笠子日卓午借問因何  
太瘦生總為從前作詩苦史記陳平傳或謂平貧何食  
而肥其嫂疾其不事家產曰亦食糠覈耳晉  
王戎之子萬少而大肥戎令食糠而肥愈甚

男婚已畢女將歸累盡身輕志莫違聞道山中食無肉  
玉池清水自生肥

東漢逸民傳向長字子平嫁娶既畢勅斷家事遂肆意  
遊五岳名山不知所終九星上經青青之月與日同昇  
合兩成一出彼玉池入乎金屋大如彈黃如橘中有佳  
味甜如蜜子能得之慎勿失黃庭內景經丹田之中精  
氣微玉池清  
水上生肥

造物知吾久念歸似憐衰病不相違風來震澤帆初飽  
雨入松江水漸肥

王注帆飽水  
肥皆方言

戲書吳江三賢畫像三首

誰將射御教吳兒長笑申公為夏姬卻遣姑蘇有麋鹿

更憐夫子得西施

公自注  
范蠡

左傳成二年楚之討陳夏氏也莊王欲納夏姬申公巫臣曰不可又及共王即位使屈巫聘於齊巫臣盡室以行及鄭使介反幣而以夏姬行遂奔晉七年楚殺巫臣之族巫臣乃通吳於晉教其射御戰陣吳始伐楚於是乎一歲七奔命史記淮南傳王召伍被與謀曰將軍上被悵然曰臣聞子胥諫吳王吳王不用乃曰臣今見麋鹿游姑蘇之臺也今臣亦見宮中生荆棘露沾衣也

浮世功勞食與眠李鷹真得水中仙不須更說知機早

直為鱸魚也自賢

公自注  
張翰

晉張翰傳字季鷹齊王同辟為東曹掾翰因秋風起思吳中菰菜蓴羹鱸魚膾曰人生貴得適志何能羈宦數

千里以要名爵乎遂命駕  
歸俄而同敗人謂之見機

千首文章二頃田囊中未有一錢看卻因養得能言鴨

驚破王孫金彈丸

公自注  
陸龜蒙

史記蘇秦曰使我有負郭田二頃豈能佩六國相印乎  
杜子美詩囊空恐羞澀留得一錢看新唐書陸龜蒙傳  
有田數百畝苦雨潦則與江通故嘗苦餓也又有鬪鴨  
一欄頗極馴養一日驛使過挾彈斃其尤者龜蒙曰此  
鴨善人言見欲附蘇州上進使者奈何斃之使人懼盡  
與囊中金以窒其口徐使問善言狀龜蒙曰能自呼名  
耳西京雜記韓嫣好彈以金為丸所失者日常千百長  
安為之語曰苦饑寒逐金丸京師兒童每聞嫣出輒隨  
之

劉孝叔會虎丘時王規父齋素祈雨不至二首

述字孝叔

覲字規父

白簡威猶凜青山興已穠  
鶴閒雲作氎駝卧草埋峰  
踈履若可教卜鄰應見容  
因公問回老何處定相逢

晉傳玄天性峻急不能有所容每有奏劾或值日暮捧  
白簡整簪帶坐而待旦於是貴游懾服臺閣生風踈履  
用張良事注見五卷杜詩王翰願卜鄰白居易與元稹  
卜鄰詩明月許同三逕夜綠楊宜作兩家春王注後有  
回先生詩或言呂洞賓易  
姓為回處士回字乃呂耳

太常齋未解不肯對纖穠只遣三千履來遊十二峰林



空谷清唱潭淨寫衰容歸去瑤臺路還應月下逢

東漢周澤字稚都為太常卧疾齋宮其妻哀澤老病問所苦澤以妻犯齋禁遂收送詔獄當世疑其詭激時人為之語曰生世不諧作太常妻一歲三百五十九日齋注又云一日不齋醉如泥宋玉神女賦穠不短纖不長史記春申君客三千人其上客皆躡珠履李白詩會向瑤臺月下逢

過永樂文長老已卒

初驚鶴瘦不可識旋覺雲歸無處尋  
三過門間老病死一彈指頃去來今  
存亡慣見渾無淚鄉井難忘尚有心  
欲向錢塘訪圓澤葛洪川畔待秋深

傳燈錄佛為太子出遊諸城門見老病死遂出家唐小說李源居洛陽惠林寺與僧圓澤遊甚密一日相約遊青城峨眉舟次南浦見婦人錦襦而汲者澤泣謂源曰婦人乎三歲矣吾當為之子無可逃者後十二年中秋天竺寺外當與公相見至暮澤亡而婦乳源後自洛適吳聞葛洪川畔牧童扣角而歌曰三生石上舊精魂賞月吟風不要論慙愧情人遠相訪此身雖異性長存源問澤公健否答曰李公真信士然俗緣未盡慎勿相近遂去不復見

贈張刁二老

張子野湖州烏程人  
刁景純潤州丹陽人

兩邦山水未淒涼二老風流總健彊共成一百七十歲  
各飲三萬六千觴藏春塢裏鶯花鬧仁壽橋邊日月長

惟有詩人被磨折金釵零落不成行

白居易九老詩七人五百七十歲拖紫紵朱白鬢鬚李  
白詩百年三萬六千日一日須傾三百盃王注藏春  
公塢名仁壽橋張子野所居詩人指  
言子野蓋子野多寵姬以戲之也

去年秋偶遊寶山上方入一小院闌然無人有一僧隱几低頭讀書與之語漠然不甚對問其鄰之僧曰此雲閣黎也不出十五年矣今年六月自常潤還復至其室則死葬數月矣作詩題其壁

雲師來寶山一住十五秋讀書常閉戶客至不舉頭去  
年造其室清坐忘百憂我初無言說師亦無對酬今年  
復扣門空房但颺颺云已滅無餘薪盡火不留卻疑此  
室中常有斯人不所遇孰非夢事過吾何求

金剛經我皆令入無餘涅槃而滅度之莊子  
養生主指窮於為薪火傳也不知其盡也

聽僧昭素琴

至一作溫

和無撻譯至平無按抑不知微妙聲究竟從何

出散我不平氣洗我不和心此心知有在尚復此微吟

史記田完世家騶忌子以鼓琴見威王曰夫大絃濁以春溫者君也小絃廉折以清者相也攫之深醲之愉者也政令

### 僧惠勤初罷僧職

軒軒青田鶴鬱鬱在樊籠既為物所縻遂與吾輩同今  
來始謝去萬事一笑空新詩如洗出不受外垢蒙清風  
入齒牙出語如風松霜髭茁病骨饑坐聽午鐘非詩能  
窮人窮者詩乃工此語信不妄吾聞諸醉翁

永嘉郡記沐溪去青田九里中有雙白鶴年年生子長  
大便去惟存雙鶴精白可愛多云神仙所養歐陽公作

梅聖俞詩序云非詩能窮人殆窮者而後工也

遊靈隱高峰塔

武林山記北高峰在靈隱寺後山山有塔記云唐天寶中建

言遊高峰塔蓐食治野裝火雲秋未衰及此初旦涼霧  
霏巖谷暗日出草木香嘉我同來人久便雲水鄉相勸  
小舉足前路高且長古松攀龍蛇怪石坐牛羊漸聞鐘  
磬音飛鳥皆下翔入門空有無雲海浩茫茫惟見聾道  
人老病時絕糧問年笑不答但指穴藜牀心知不復來  
欲歸更徬徨贈別留匹布今歲天蚤霜

史記韓信嘗從南昌亭長寄食數月亭長妻患之乃晨炊蓐食後漢廉范傳注蓐食蚤起食於寢蓐中也三國管寧自越海及歸常坐一木榻積五十餘年未嘗箕股其榻上當膝處皆穿按穴蓆牀似用其意故王注引此之存

八月十七日天竺山送桂花分贈元素

月缺霜濃細藥乾此花元屬桂堂仙  
驚峰子落驚前夜蟾窟枝空記昔年  
破滅山一作高僧憐耿介練裙溪女鬪

清妍願公採擷紉幽佩莫遣孤芳老澗邊

王注天竺山相傳有梵僧云此山自天竺驚山飛來八月十五夜嘗有桂子落

捕蝗至浮雲嶺山行疲苦有懷子由弟二首

西來煙陣塞空虛，灑遍秋田雨不如。  
新法清平那有此，老身窮苦自招渠。  
無人可訴烏銜肉，憶弟難憑犬寄書。  
自笑迂疎皆此類，區區猶欲理蝗餘。

白樂天捕蝗詩始自兩河及三輔，薦食如蠶飛似雨。漢書黃霸為潁川太守，常欲有所伺察，擇廉吏遣行吏出，不敢舍郵亭食於道傍。烏攫其肉，民有詣府口言事者，適見之，霸與語，道此後日吏還，謁霸，霸見迎勞曰：「甚苦。」食道傍乃為鳥所盜，肉吏大驚，以霸具知其起居所問，毫釐不敢有隱。晉陸機有駿犬名黃耳，甚愛之，既而羈寓京師，久無家問，笑語犬曰：「我家絕無書信，汝能賫書。」取消息，不犬搖尾作聲，乃為書以竹筒盛之，繫其頸，犬



尋路南走遂至  
其家得報還洛

霜風漸欲作重陽  
熠熠溪邊野菊黃  
久廢山行疲犖确  
尚能村醉舞淋浪  
獨眠林下夢魂好  
回首人間憂患長  
殺馬毀車從此逝  
子來何處問行藏

犖确注見上卷再遊徑山韓退之詩淋浪身上衣後漢  
周燮傳馮良年三十為尉從佐奉檄迎督郵即路慨然  
恥在廝役因壞車殺馬毀裂衣冠遁至犍為從杜撫學  
妻子求索蹤迹斷絕後乃見草中有敗車死馬衣裳腐  
朽謂為虎狼盜賊所害發  
喪制服十許年乃還鄉里

青牛嶺高絕處有小寺人迹罕到

暮歸走馬沙河塘  
爐煙裊裊十里香  
朝行曳杖青牛嶺  
崖泉咽咽千山靜  
君勿笑老僧耳聾  
喚不聞百年俱是  
可憐人明朝且復  
城中去白雲卻在  
題詩處

虛全詩有錢無錢俱可憐  
百年驟過如流川王維  
山中詩城郭遙相望  
惟應見白雲

新城陳氏園次鼃補之韻

荒涼廢圃秋寂歷  
幽花晚山城已窮  
僻況與城相遠我  
來亦何事徙倚望  
雲巘不見苦吟人  
清樽為誰滿

梅聖俞詩中有毛長官者  
今於潛令國華也聖

俞沒十五年而君猶為令捕蝗至其邑作詩戲之

詩翁憔悴老一官厭見苜宿堆青盤歸來羞澀對妻子  
自比鮎魚緣竹竿今君滯留生二毛飽聽衙鼓眠黃紬  
更將嘲笑調朋友人道獼猴騎土牛願君恰似高常侍  
暫為小邑仍刺史不願君為孟浩然卻遭明主放還山  
宦遊逢此歲年惡飛蝗來時半天黑羨君封境稻如雲  
蝗自識人人不識

苜蓿注三見詩翁梅聖俞也聖俞以詩知名仕宦三十年終不得一館職及受一勅修書語其妻刁氏曰吾之修書可謂胡孫入布袋矣妻對曰君之仕宦亦何異鮎魚緣竹竿乎潘岳秋興賦余春秋三十二始見二毛王注世傳太祖戒勅縣令勿於黃紬被底放衙又周泰擢新城太守司馬宣王使鍾繇調之曰君釋褐登宰府三十六日而擁麾蓋守兵馬郡乞兒乘小車一何駛乎泰曰君明公之子有文采守吏職獼猴騎土牛又何遲也李白詩身騎土牛滯東魯唐書高適始為封丘尉哥舒翰表掌書記適有詩云只言小邑無所為公門百事皆有期杜子美贈詩云脫身簿尉中始與撫楚辭後歷蜀彭二州刺史西川節度使終刑部侍郎左散騎常侍又孟浩然遊京師與王維善維私邀入禁省俄駕至遽匿牀下維以寔對玄宗喜曰朕聞其人久矣何懼而匿詔出再拜令自誦其詩至不才明主棄帝怒曰卿不求仕奈何誣我因放還後漢卓茂為密縣令天下大蝗獨不

入密縣界魯恭為中年令郡國螟傷稼犬牙緣界不入  
中年宋均為九江太守會山陽楚沛多蝗其飛至九江  
界者輒東西散去戴封為西華令汝潁有蝗獨不入西  
華界時督郵行縣蝗忽大至督郵去蝗亦頓除一境奇  
之

### 與毛令方尉游西菩提寺二首

按於潛縣圖經  
毛君實同尉方

君武與東坡於熙寧七年八月廿七日同遊  
西菩山明智院石刻存焉西菩提寺去縣十  
里五

推擠不去已三年魚鳥依然笑我頑人未放歸江北路  
天教看盡浙西山尚書清節衣冠後處士風流水石間

一笑相逢那易得數詩狂語不須刪

三國毛玠典選舉以儉率人魏太祖以素屏風素馮几  
賜玠曰君有古人之風故賜君古人之服玠居顯位常  
布衣蔬食後歷官為尚書僕射唐書方子字雄飛新安  
人咸通中遷於會稽鑑湖之濱漁釣為樂時號逸士有  
詩十卷序之者謂入錢起之室唐末宰臣奏名儒不遇  
者十有五人請賜一官以慰泉下干其一也一曰干桐  
廬人毛令方尉  
當是二人後

路轉山腰足未移水清石瘦便能奇白雲自占東西嶺  
明月誰分上下池黑黍黃粱初熟後朱柑綠橘半晡時  
人生此樂須天賦莫遣兒郎取次知

於潛圖經寺前有東西兩山或有雲晦遙望如嶺結用王羲之但恐兒輩覺語意注屢見

### 聽賢師琴

大絃春溫和且平小絃廉折亮以清平生未識宮與角  
但聞牛鳴盜中雉登木門前剝啄誰叩門山僧未聞君  
勿嗔歸家且覓千斛水淨洗從前箏笛耳

大絃小絃騶忌子見齊威王語注已見本卷管子地員篇凡聽徵如負楮豕覺而駭凡聽羽如鳴馬在野凡聽宮如牛鳴窳中凡聽商如離羣羊凡聽角如雉登木以鳴音疾以清樂天廢琴詩何物使之然羌笛與秦箏先生詩話昵昵兒女語恩怨相爾汝劃然變軒昂勇士赴敵場此退之聽穎師琴詩也歐陽公當問僕琴詩何者

最佳余以此答之公言此詩固奇麗然自是聽琵琶詩  
非琴詩余退而作抗僧惟賢詩云云詩成欲寄公而公  
薨至今  
以為恨

贈寫真何充秀才

君不見潞州別駕眼如電左手挂弓橫撚箭又不見雪  
中騎驢孟浩然皺眉吟詩肩聳山饑寒富貴兩安在空  
有遺像留人間此身常擬同外物浮雲變化無蹤迹問  
君何苦寫我真君言好之聊自適黃冠野服山家容意  
欲置我山巖中勲名將相今何限往寫褒公與鄂公



晉王戎神彩秀徹視日不眩裴楷見而目之曰戎眼爛  
爛如巖下電唐書明皇英武善射初封臨淄王為潞州  
別駕尚書諱錄潞州啟聖宮有明皇欹枕斜書壁處腰  
鼓馬槽竝在明皇有一目微斜故作橫撫箭之狀郊特  
牲野夫黃冠草服世說顧長康畫謝幼輿在巖石裏人  
問其所以曰此子宜置丘壑中杜甫丹青引凌煙功臣  
少顏色將軍下筆開生面良相頭上進賢冠猛將腰間  
大羽箭褒公鄂公毛髮動英資颯爽來酣戰褒公段志  
玄鄂公尉遲敬德也

回先生過湖州東林沈氏飲醉以石榴皮書其  
家東老菴之壁云西鄰已富憂不足東老雖貧  
樂有餘白酒釀來因好客黃金散盡為收書西

蜀和仲聞而次其韻三首東老沈氏之老自謂

也湖人因以名之其子偕作詩有可觀者

按王會回

仙碑云熙寧元年八月十九日湖州歸安縣之東林有隱君子沈思字持正隱於東林因以東老名焉能釀十八仙白酒一日有客自稱回道入長揖東老曰知君白酒新熟願求一醉否公命之坐徐觀其目碧色粲然光彩射人與之語無不通究故知非塵埃中人也因出與飲自日中至暮已飲數斗殊無酒色回曰久不遊浙中今為子有陰德留詩贈子乃

臂席上榴皮畫

字題於卷壁

世俗何知窮是病神仙可學道之餘但知白酒留佳客

# 不問黃公覓素書

史張良傳老父出一編書曰讀是則為王者師後十三年孺子見我濟北穀城山下黃石即我也其書乃太公兵法

符離道士晨興際華岳先生尸解餘忽見黃庭丹篆句  
猶傳青紙小朱書

王注宿州符離縣天慶觀甯道士者少年談老莊極可采甯云道中賣菜人儀狀雄偉常此遊息一日於扉上題二絕句而去書為大篆體法極異或曰此洞賓先生所書也郡人爭刻之以治疾字字刻痕深寸餘墨迹不滅神仙傳陳搏字圖南居華山雲臺觀預知死日端拱初卒於蓮花峰下張超谷室中死七日有五色雲蔽塞

洞口經月不散又華陽處士李奇自言開元中郎官嘗  
至博齋中以朱書青紙詩令小童齋似博博與唱和交  
友焉呂洞賓詩時傳丹篆千年術口誦黃庭  
兩卷經鶴觀天壇槐影裏悄無人迹戶長扃

淒涼雨露三年後髣髴塵埃數字餘至用榴皮緣底事  
中書君豈不中書

禮祭義雨露既濡君子履之必有怵惕之心韓愈毛穎  
傳穎拜中書令上嘗呼為中書君後因進見上見其髮  
禿又所模畫不能稱上意上嘻笑曰中書君老  
而禿不任吾用吾謂君中書君今不中書耶

李行中醉眠亭三首

已向閒中作地仙更於酒裏得天全從教世路風波惡

# 賀監偏工水底眠

唐孫思邈千金方以蠶蟲水蛭為藥以害物命不獲上昇為地仙莊子醉者墜車雖疾不死骨節與人同而犯害與人異其神全也杜子美飲中八仙歌知章騎馬似乘船眼花落井水底眠

君且歸休我欲眠人言此語出天然醉中對客眠何害須信陶潛未若賢

晉陶潛有酒輒設不問賓主醉則語客曰我醉欲眠卿且去李白詩我醉欲眠君且去明朝有意抱琴來

孝先風味也堪憐肯為周公晝日眠枕麴先生猶笑汝枉將空腹貯遺編

後漢邊韶字孝先嘗晝日假寐弟子嘲之云云孝先聞之答曰邊為姓孝先字腹便便五經笥但欲眠思經事寐與周公同夢靜與孔子同意師而可嘲出何典記又互見六卷寶山晝睡詩注劉伶酒德頌先生於是方捧甕承槽銜杯嗽醪奮鼻箕踞枕麪藉糟

潤州甘露寺彈箏

多景樓上彈神曲欲斷哀絃再三促江妃出聽霧雨愁

白浪翻空動浮玉

公自注金山名

喚取吾家雙鳳槽遣作三峽

孤猿號與君合奏芳春調啄木飛來霜樹杪

王注神曲蓋今箏中有之又楊玄素云孫洙巨源王存正仲與東坡同遊多景樓京師官妓皆在而胡琴者姿

伎尤妙三公皆一時英彥酒闌巨源請於東坡曰殘霞  
晚照非奇辭遂作採桑子所謂多情多感仍多病多景  
樓中是也郭璞江賦馮夷倚浪以傲睨江妃含顰而綿  
眇梁簡文巴東三峽歌巴東三峽巫峽長猿鳴三聲淚  
沾裳歐陽公楊直講女奴彈琵琶詩大絃聲遲小絃促  
十歲嬌兒彈啄木啄木不啄新生枝唯啄牙槎枯木腹

單同年求德興俞氏聚遠樓詩三首

雲山煙水苦難親野草幽花各自春  
賴有高樓能聚遠一時收拾與閒人

無限青山散不收雲奔浪卷入簾鉤  
直將眼力為疆界何啻人間萬戶侯

聞說樓居似地仙不知門外有塵寰幽人隱几寂無語  
心在飛鴻滅沒間

前漢郊祀志公孫卿言仙人好樓居於是上令長安則  
作飛廉桂館甘泉則作益壽延壽館使卿持節設具而  
候神人乃作通天臺置祠  
具其下將招來神仙之屬

平山堂次王居卿祠部韻

高會日陪山簡醉狂言屢發次公醒酒如人面天然白  
山向吾曹分外青江上飛雲來北固檻前修竹憶南屏  
六朝興廢餘丘壘空使姦雄笑寧馨



晉書山簡鎮襄陽于時四方寇亂簡優游卒歲每出遊  
多之習家池上置酒輒醉名之曰高陽池次公酒狂注  
屢見晉桓溫傳溫過泗踐北境與僚屬登平乘樓眺矚  
中原慨然曰遂使神州陸沉百年丘墟王夷甫諸人不  
得不任其責王衍傳衍字夷甫總角嘗造山濤濤嗟歎  
良久既去目而送之曰何物老嫗生此寧馨兒然誤天  
下蒼生者未  
必非此人也

### 次韻陳海州書懷

鬱鬱蒼梧海上山

公自注東海鬱州  
山云自蒼梧浮來

蓬萊方丈有無間

舊聞草木皆仙藥欲棄妻孥守市闌雅志未成空自歎  
故人相對若為顏酒醒卻憶兒童事長恨雙鳬去莫攀

公自注陳

曾令鄉邑

史封禪書蓬萊方丈瀛州此三神山者其傳在渤海中  
去人不遠惠且至則船風引而去蓋嘗有至者諸仙人  
及不死之藥皆在焉漢書梅福字子真元始中王莽專  
政福一朝棄妻子去九江至今傳以為仙其後人有見  
福於會稽者變姓名為吳市門卒云雙兔注再見前

# 次韻陳海州乘槎亭

因話錄云漢書載張騫窮河源言其奉使之遠實無

天河之說惟張華博物志云近世有人居海上  
上每年八月見乘槎來不違時齊一年糧乘  
之到天河見婦人織丈夫飲牛造問嚴君平  
曰某時客星犯斗牛即此人也後世相傳云  
得織女支機石持以問君平都是虛無之說  
今成都嚴真觀有一石呼為支機石云寶歷

中子於京都途中逢官差夫遞昇張騫槎先在東都禁中今唯詔索有司取進不知是何物也前輩詩往往有張騫槎者相襲訛謬矣縱出雜書亦不足據也

人事無涯生有涯  
逝將歸釣漢江槎  
乘桴我欲從安石  
遁世誰能識子嗟  
日上紅波浮翠巘  
潮來白浪卷青沙  
清談美景雙奇絕  
不覺歸鞍帶月華

莊子養生主吾生也有涯而知也無涯晉謝安與孫綽等泛海注詳第三卷詩國風丘中有麻彼留子嗟小序思賢也莊王不明賢人放逐國人思之而作是詩也傳留大夫氏子嗟字也

### 次韻孫職方蒼梧山

蒼梧奇事豈虛傳荒怪還須問子年遠託鼇頭轉滄海  
來依鵬背負青天或云靈境歸賢者又恐神功亦偶然  
聞道新春恣遠覽羨君平地作飛仙

晉王嘉字子年著拾遺記事多怪詭列子海中有五山  
根無所連著帝遣巨鼇十五舉首戴之山始峙而不動  
莊子逍遙遊背負  
青天而莫之天開

次韻孫巨源寄漣水李盛二著作并以見寄五  
絕

南嶽諸劉豈易逢相望無復馬牛風山公雖見無多子

社燕何由戀塞鴻

公自注昔與巨源劉貢父劉莘老相過於山陽自爾契闊惟巨源近者復

相見於京口公嘗有詩云有如社燕與秋鴻相逢未穩還相送

漢紀王昌字即邯鄲人詐稱成帝子子與自立為天子遣將帥徇幽冀移檄有云南嶽諸劉為朕先驅王注借用諸劉字指言貢父莘老晉山濤字巨源公借以指孫也

高才晚歲終難進勇退當年正急流不獨二疏為可慕

他時當有景孫樓

公自注巨源近離東海郡有景疏樓

宋史陳搏謂錢惟演有仙骨麻衣道者曰此人但能於急流中勇退耳惟演果早年恬退漢書疏廣為太子太傅兄子受為少傅廣謂受曰吾聞知足不辱知止不殆功遂身退天之道也即日父子移病上疏乞骸骨去道

路觀者皆曰賢哉二大  
夫或歎息為之泣下

漱石先生難可意

公自注謂巨源

齧氈校尉久無朋

公自注謂

應

知客路愁無奈故遣吟詩調李陵

公自注謂李君也

世說孫楚謂王濟曰欲枕石漱流誤云漱石枕流濟曰  
流可枕石可漱乎楚曰所以枕流欲洗其耳所以漱石  
欲礪其齒漢書蘇武留匈奴單于欲降之乃幽武置大  
窖中絕不與飲食武卧齧氈毛并咽之數日不死匈奴  
以為神又初武與李陵俱為侍中武使匈奴明年陵降  
久之武歸漢陵置酒起舞歌曰徑萬里兮度沙幕云云  
陵泣數行下因與武訣按蘇武有別李陵詩  
四首陵亦作三首故後世稱五言首蘇李云

雲雨休排神女車忠州老病畏人誇詩豪正值安仁在

空看河陽滿縣花

公自注盛為邑宰

白居易赴忠州道過巫山題詩於廟云為報巫山神女道速排雲雨待清詩晉潘岳字安仁為河陽令種花滿縣人號河陽一縣花

膠西未到吾能說桑柘禾麻不見春  
不羨京塵騎馬客羨他淮月弄舟人

王莽

漢家殊未識經綸入手功名事事新  
百尺穿成連夜井千金購得解飛人

漢書王莽傳宗室廣饒侯劉京上言齊郡臨淄縣昌興亭長辛當一幕數夢曰吾天公使也天公使我告亭長攝皇帝當為真即不信我此亭中當有新井亭長晨起視亭中誠有新井入地且百尺又莽又博募有奇技術可以攻匈奴者或言能飛一日千里莽輒試之取大鳥翮為兩翼頭與身皆著毛通引環紐飛數百步墮莽知不可用苟欲獲其名皆拜為理軍賜以車馬待發衛按此與董卓二詩具有深意入手功名事事新譏安石之變法豈信車中有布乎指呂惠卿之負安石也

### 董卓

公業平時勸用儒諸公何事起相圖只言天下無健者  
豈信車中有布乎



後漢董卓傳鄭泰字公業與周毖伍瓊共說卓以韓馥  
劉岱孔伷諸人為牧守及義兵起卓大怒曰卓初入朝  
二子勸用善士故相從而諸君到官舉兵相圖此二君  
賣卓卓何相負遂斬毖瓊而鄭泰以說辭獲免又王允  
與呂布謀誅卓有人書呂字於布上荷而行市歌曰  
布乎有告卓者卓不悟又董公健見第一卷詩注

虎兒

王注此篇當  
為遠姪作

舊聞老蚌生明珠未省老兔生於菟老兔自謂月中物  
不騎快馬騎蟾蜍蟾蜍爬沙不肯行坐令青衫垂白鬚  
於菟駿猛不類渠指揮黃熊駕黑羆丹砂紫麝不用塗  
眼光百步走妖狐妖狐莫誇智有餘不勞搖牙咀爾徒

後漢韋康字元將弟誕字仲將孔融與康父書曰不意  
雙珠近出老蚌左傳楚人謂虎為於菟五經通義月中  
有兔與蟾蜍韓退之月蝕詩爬沙腳手鉤誰使女解緣  
青冥王注世之小兒必塗丹砂紫磨以辟不祥魏志曹  
真嘗會吳質等真肥朱鑠瘦質召優使說肥瘦真恚拔  
刀瞋目言爾敢輕脫吾斬爾遂罵坐質按劍曰曹子丹  
汝非屠猪机上肉吳質吞爾不搖  
喉咀爾不搖牙何敢恃勢驕邪

除夜病中贈段屯田

王注段  
釋之也

龍鍾三十九勞生已強半歲暮日斜時還為昔人歎

公自

注樂天詩云行年三  
十九歲莫日斜時

今年一線在那復堪把玩欲起強

持酒故交雲雨散惟有病相尋空齋為老伴蕭條燈火

冷寒夜何時旦倦僕觸屏風饑鼯嗅空案數朝閉閤卧  
霜髮秋蓬亂傳聞使者來策杖就梳盥書來苦安慰不  
怪造請緩大夫忠烈後高義金石貫要當擊權豪未肯  
覷衰懦奴亂切一作慙此生何所似暗盡灰中炭歸田計已決  
此邦聊假館三徑麤成資一枝有餘暖願君更信宿庶  
奉一笑粲

杜詩何人錯憶窮愁日愁日愁隨一線長歲時記宮中  
以細線量日影至日日影添一線柳子厚詩前過三十  
七年與瞬息無異後所得者其不足把玩亦已審矣白  
居易詩病與樂天相伴住觸屏風用陳威事詳二卷王

頤赴建州錢監詩注詩國風首如飛蓬唐史段太尉秀實謚忠烈初朱泚反召秀實議事語至僭位秀實勃然起唾泚面大罵曰狂賊吾恨不斬汝頭豈從汝反耶奮笏擊泚泚舉臂自捍才中其額血流旬旬而走三徑用蔣詡事詳五卷和邵同年詩注莊子鷦鷯巢於深林不過一枝左傳凡師一宿為舍再宿為信

喬太博見和復次韻答之

百年三萬日老病常居半其間互憂樂歌笑雜悲歎顛倒不自知直為神所玩須臾便堪笑萬事風雨散自從識此理久謝少年伴逝將遊無何豈暇讀城旦非才更多病二事可并案愧煩賢使者弭節整紛亂喬侯瑚璉

質清廟嘗薦盥奮髯百吏走坐變齊俗緩未遭甘鷄退  
並進恥魚貫每聞議論餘凜凜激貪懦莫耶當自躍豈  
復煩爐炭便應朝秣越未暮刷燕館胡為守故丘眷戀  
桑榆暖為君叩牛角一詠南山朶

列子楊朱曰百年壽之大齊得者千無一焉設有一者  
孩抱以逮昏老幾居其半矣莊子遊於無何有之鄉漢  
書實太后好老子書召問轅固固曰此家人言耳太后  
怒曰安得司空城旦書乎後漢孔融傳曹操討烏桓融  
嘲之曰大將軍遠征蕭條海外昔肅慎氏不貢楷矢丁  
零盜蘇武牛羊可并案也詩頌小序清廟祀文王也周  
易觀盟而不薦漢書朱博傳遷琅玕太守齊部舒緩養  
名博新視事右曹掾史皆移病卧博奮髯抵几曰觀齊

兒欲以此為俗耶皆斥罷諸病吏白巾走出府門又敕  
功曹官屬多裋衣大裙不中節度自今掾史衣皆令去  
地三寸視事數年大改其俗左傳僖十六年六鷁退飛  
過宋都周易貫魚以宮人寵莊子大宗師大冶鑄金金  
踴躍曰我且必為鏐鉚大冶必以為不祥之金刷燕秣  
越顏延年賦語已見李白詩雞鳴刷幽晡秣越唐明皇  
續薛令之詩任逐桑榆暖詳見三卷首荷槃注琴操甯  
戚衛人飯牛扣角而商歌曰南山粲白石爛生不逢堯  
與舜禪短布單衣裁至骭從昏飯牛薄夜半長夜漫漫  
何時旦桓公聞之舉以為相按案本作研音岸山石貌

## 二公再和亦再答之

寒難知將晨饑鶴知夜半亦知老病客遇節嘗感歎光  
陰等敲石過眼不容玩親友如搏沙放手還復散羈孤

每自笑寂寞誰肯伴元達號神君高論森月旦紀明本  
賢將汨沒事堆桮欣然肯相顧夜閣燈火亂盤空愧不  
飽酒薄僅堪盥雍容許著帽不怪安石緩雖無窈窕人  
清唱弄珠貫幸有縱橫舌說劍起慵懦二豪沈下位暗  
火埋濕炭豈似草玄人嘿嘿老儒館行看富貴逼炙手  
借餘暖應念苦思歸登樓賦王粲

白居易詩蝸牛角上爭何事石火光中寄此身晉良吏  
傳喬智明字元達為隆慮共二縣令二縣愛之號為神  
君後漢許劭傳劭字子將與從兄靖俱有高名好共覈  
論鄉黨人物每月輒更其品題故汝南俗有月旦評又

段頴傳頴字紀明為護羌校尉窮討先零東羌悉平之初頴與皇甫威明張然明並知名顯達京師稱為涼州三明云嵇康書堆按滿几已見前晉書桓溫請謝安為司馬溫詣安值其理髮安性遲緩久而方罷使取幘溫見留之曰令司馬著帽進其見重如此莊子有說劍篇唐元載為相有用事四人熏灼中外人為之語曰卓李鄭薛炙手可熱杜詩炙手可熱勢絕倫三國王粲以西京擾亂乃避地荊州依劉表因登江陵城樓懷歸作登樓賦

### 雪後書北臺壁二首

黃昏猶作雨纖纖  
夜靜無風勢轉嚴  
但覺衾裯如潑水  
不知庭院已堆鹽  
五更曉色來書幌  
半夜寒聲落畫簷



試掃北臺看馬耳未隨埋沒有雙尖

王注馬耳山名與臺相對按先生超然臺記云園之北因城以為臺者舊矣又云南望馬耳常山

城頭初日始翻鴉陌上晴泥已沒車凍合玉樓寒起粟  
光搖銀海眩生花遺蝗入地應千尺宿夢連雲有幾家  
老病自嗟詩力退空吟冰柱憶劉義

王注道經以項肩骨為玉樓眼為銀海起粟使趙飛燕雖寒體無軫粟字又世傳王荊公嘗誦先生此詩歎云子瞻乃能使事至此公壻蔡卞曰句不過詠雪之狀莊樓臺如玉樓瀾漫萬象若銀海耳荊公哂曰此出道書也又蝗遺子於地若雪深一尺則入地一丈麥得雪則滋茂而成稔歲此老農語也唐史劉又韓愈門人作雪

車冰柱二詩出盧仝孟郊右樊宗師見而拜之

謝人見和前篇二首

已分酒杯欺淺懦敢將詩力鬪深嚴  
漁蓑句好真堪畫柳絮才高不道鹽  
敗履尚存東郭足飛花又舞謫仙簷  
書生事業真堪笑忍凍孤吟筆退尖

韓退之聯句再入更深嚴王注鄭谷雪詩江上晚來堪畫處漁人披得一蓑歸段贊善摹為畫國谷以詩謝之曰受余風雪句幽絕寫漁蓑世說謝安嘗內集俄而雪驟下安曰白雪紛紛何所似兄子朗曰撒鹽空中差可擬道韞曰未若柳絮因風起又張融作海賦以示顧愷之愷之曰公此賦實超玄虛但不道鹽耳史記滑稽傳

東郭先生久待詔公車貧困衣襍履不完行雪中履有  
上無下足盡踐地道中人笑之先生應之曰誰能履行  
雪中令人視之其上履也其下乃似人足者乎李白詩  
飛花送酒舞前簷退之詩免尖斜莫並蓋苦寒則筆退  
尖  
笑

九陌淒風戰齒牙銀杯逐馬帶隨車也知不作堅牢玉  
無奈能開頃刻花得酒彊歡愁底事閉門高卧定誰家  
臺前日暖君須愛冰下寒魚漸可叉

韓退之雪詩隨車翻縞帶逐馬散銀杯謝惠連雪賦白  
玉雖白空守貞兮未若茲雪因時興滅注引劉熙注孟  
子云白雪之性消白玉之性堅頃刻花韓湘事見上卷  
冬日牡丹注汝南先賢傳洛陽大雪積地丈餘令自出

案行至素安門無行迹謂安已死令人除雪入戶見安  
偃卧問何以不出曰大雪人皆箴不宜千人令以為賢  
舉為孝  
康也

鐵溝行贈喬太博

名敘字  
禹功

城東坡隴何所似風吹海濤低復起城中病守無所為  
走馬來尋鐵溝水鐵溝水淺不容輶恰似當年韓與侯  
有魚無魚何足道駕言聊復寫我憂孤村野店亦何有  
欲發狂言須斗酒山頭落日側金盃倒著接羅搔白首  
忽憶從軍年少時輕裘細馬百不知臂弓腰箭南山下

追逐長楊射獵兒  
老去同君兩憔悴  
犯夜醉歸人不避  
明年定起故將軍  
未肯先誅霸陵尉

韓退之詩吾黨侯生字叔起呼我持竿釣溫水又此縱  
有魚何足求杜子美詩夜闌接軟語落月如金盃晉書  
山簡傳襄陽兒童歌曰時時能騎馬倒著白接羅漢揚  
雄傳上將大誇胡人以多禽獸命右扶風發民入南山  
捕熊羆豪豬虎豹玃獾狐菟麋鹿輸長楊射熊館以網  
為周法縱禽獸其中令胡人手搏之上親臨焉雄從至  
射熊館還獻上長楊賦以風史記李廣傳廣居藍田南  
山中射獵嘗夜從一騎出從人田間飲還至亭霸陵尉  
醉呵止廣廣騎曰故李將軍尉曰今將軍尚不得夜行  
何乃故也止廣宿亭下居無何廣為右北平太守請霸  
陵尉與俱至軍斬之王注禹功嘗欲換  
武故有此句其後果換左藏知欽州

出城送客不及步至溪上二首

送客客已去尋花花未開未能城裏去且復水邊來父  
老借問我使君安在哉今年好風雪會見麥千堆

春來六十日笑口幾時開會作堂堂去何妨得得來倦

遊行老矣舊隱賦歸哉東望峨眉小廬山翠作堆

公自注郡

東廬山絕類

峨眉而小

白樂天詩青春只有九十日不開口笑是癡人唐人詩  
青春背我堂堂去白髮期人故故生僧貫休詩一瓶一  
鉢垂垂老萬水千山得得來

蘇州姚氏三瑞堂

公自注姚氏世以孝稱

君不見董召南隱居行義孝且慈天公亦恐無人知故  
令雞狗相哺兒又令韓老為作詩爾來三百年名與淮  
水東南馳此人世不乏此事亦時有楓橋三瑞皆目見  
天意宛在虞鰥後惟有此詩非昔人君更往求無價手

韓愈嗟哉董生行壽州屬縣有安豐唐貞元時縣人董  
生召南隱居行義於其中又曰嗟哉董生孝且慈人不  
識惟有天翁知生祥下瑞無時期家有狗乳出求食雞  
來哺其兒啄啄庭中拾蟲蟻哺之不食鳴聲悲全篇見  
文集吳郡圖經楓橋在吳縣西九里尚  
書有鰥在下曰虞舜蓋姚氏所自出

莫笑銀杯小  
荅喬太博

陶潛一縣令獨飲仍獨醒  
猶將公田二頃五十畝種秫  
作酒不種秔我今號為二千石  
歲釀百石何以醉賓客  
請君莫笑銀杯小爾來歲旱東海窄  
會當拂衣歸故丘  
作書貸粟監河侯萬斛船中著美酒  
與君一生長拍浮  
陶潛種秫詳六卷自昌化雙谿館詩注  
莊子外物篇莊  
周家貧故往貸粟於監河侯  
晉畢卓嘗謂人曰得酒滿  
數百斛船四時甘味置兩頭  
右手持酒杯  
左手持蟹螯拍浮酒船中便足了一生矣

送段屯田分得于字



勸農使者古大夫不惜春衫踐泥塗王事靡盬君甚劬  
奉常客卿虬兩須東武縣今天馬駒泮宮先生非俗儒  
相與野飲四子俱樂哉此樂城中無溪邊策杖自攜壺  
腰笏不煩一作頌何易于膠西病守老且迂空齋愁坐紛  
墨朱四十豈不知頭顱畏人不出何其愚

王注勸農使者指段也田奉常客卿喬太博也應為太  
常博士矣時趙果為郡教授三國崔瑗對賓客虬鬚直  
視唐書何易于為益昌令刺史崔朴常乘春與賓屬汎  
舟索民挽繹易于腰笏身挽朴驚問狀對曰民方耕桑  
不可役縣令閒暇當任其勞朴愧疾驅去拙道陶弘景  
與從兄書云昔仕宦期四十左右作尚書郎即投簪高

邁今三十六方作奉朝  
請頭顱可知不如早去

和段屯田荆林館

南山有佳色無人空自竒  
清詩為題品草木變芬菲  
謝女得秀句留待中郎歸  
便當勤鞭策僕倦馬亦饑

公自注段

有姪女

在密

施註蘇詩卷九

欽定四庫全書薈要卷一萬四千九百六十一集部

施註蘇詩卷十

宋 蘇軾撰

宋 施元之註

武進邵長蘅刪補

詩三十七首

時守高密作

贈上天竺辯才師

蘇子由辯才法師塔銘畧云師姓徐氏名元淨字無象於

潛人生而右肩肉起如袈裟條八十一日乃減十歲出家二十五賜紫及辯才疏及其終八十有一沈公邁治杭命住上天竺增室幾至萬礎重樓傑閣冠於浙西後退居龍井東

坡守杭作亭風篁嶺上名過溪亦曰  
二老此詩疑倅杭日所作誤真此卷

南北一山門上下兩天竺中有老法師瘦長如鸛鵲不  
知修何行碧眼照山谷見之自清涼洗盡煩惱毒坐令  
一都會男女禮白足我有長頭兒角頰峙犀玉四歲不  
知行抱負煩背腹師來為摩頂起走趁奔鹿乃知戒律  
中妙用謝羈束何必言法華佯狂啖魚肉

白樂天寄天竺師詩一山門作兩山門兩寺元從一寺  
分唐裴寬傳寬衣碧瘡而長號碧鵲雀碧眼白足注並  
見七卷後漢賈逵傳自為兒童常在太學諸儒為之語  
曰問事不休賈長頭國語鄭史伯曰今王惡角犀豐盈

後漢李固傳貌狀有奇表昂角匿犀足履龜文韓退之  
送僧澄觀詩有僧來訪呼使前伏犀插腦高頰顴摩頂  
用徐陵侯寶誌事詳六卷席上代人贈別詩注子由塔  
碑子瞻中子迨生三年不能行請師為落髮摩頂晉唐  
彬傳身長八尺走及奔鹿王注京師開寶寺僧俗姓張  
好誦法華經故呼張法華其言語散亂不經故亦呼為  
風法華又蘇州義師狀如風狂  
好活燒鯉魚不待熟而食之

### 游廬山次韻章傳道

塵容已似服轅駒野性猶同縱壑魚出入巖壑千仞表  
較量筋力十年初雖無窈窕驅前馬還有鴟夷挂後車  
莫笑吟詩淡生活當令阿買為君書

孔稚圭北山移文抗塵容而走俗狀漢灌夫傳局趣効  
轅下駒王褒傳褒聖主得賢臣頌云翼乎如鴻毛遇順  
風沛乎如巨魚縱大壑晉王衍傳巖巖清峙壁立千仞  
揚雄方言秦晉閒美狀為窈言閑都也美心為窈言幽  
靜也儀禮有執燭前馬國語勾踐卑事夫差親為夫差  
前馬王注言官伎引馬也鴻夷詳七卷胡穆秀才遺白  
銅器詩注古詩話裴令公夜宴公索聯句元白有得色  
至楊汝士曰昔日蘭亭無艷質此時金谷有高人白知  
不能加遽曰笙歌鼎沸勿作此冷淡生活元曰樂天可  
謂能保其名也元乃微之韓退之贈張祕書詩阿買不  
識字頗知書八分詩成使之寫亦足張吾軍注或問  
魯直阿買是退之何人答云退之姪必有據而云

## 廬山五詠

廬教洞

圖經教秦博士避  
難此山遂得名

上界足官府飛昇亦何益還在此山中相逢不相識  
韓退之酬盧給事詩天門九扇相當開上界真人  
足官府李太白通塘曲相逢不相識出沒繞通塘

### 飲酒臺

博士雅好飲空山誰與娛莫向驪山去君王不喜儒

史記秦始皇葬驪山又三十五年諸生四百六十餘人  
皆坑之咸陽衛宏古文官書序秦始皇密令冬種瓜於  
驪山谷中溫處瓜實成詔博士諸生說之人人各異使  
往視之為伏機從上填之以土皆壓死今新豐溫湯處  
號愍儒鄉見漢書儒林傳註漢酈食  
其傳初見沛公騎士曰沛公不喜儒

### 聖燈巖

石室有金丹山神不知祕何必露光芒夜半驚童稚

三泉

皎皎巖下泉無人還自潔不用比三星清光同一月

詩國風綢繆東星三星在天王注  
傳曰明星之多不如一月之光

障日峰

長安自不遠蜀客苦思歸莫教名障日喚作小峨眉公自

注其狀類峨眉

眉但小耳

晉明帝紀帝年數歲元帝坐置膝上因長安使來問曰  
汝謂日與長安孰遠對曰長安近不聞人從日邊來元



帝異之明日宴羣僚又問之對曰日近元帝失色曰何  
乃異向者之言乎對曰舉頭見日不見長安由是益奇  
之李白登鳳皇臺詩總為浮雲能蔽日長  
安不見使人愁古樂府石崇作思歸引

### 次韻章傳道喜雨

公自注禱  
常山而得

去年夏旱秋不雨海畔居民飲鹹苦今年春暖欲生螻  
地上戢戢多於土預憂一日開兩翅口吻如風那肯吐

前時渡江入吳越布陣橫空如項羽

公自注去歲錢塘  
見飛蝗自西北來

極可畏農夫拱手但垂泣人力區區固難禦僕緣髮毛

一作

尾困牛馬啖齧衣服穿房戶坐觀不救亦何心秉畀炎

火傳自古荷鋤散掘誰敢後得米濟饑還小補常山

神信英烈撫駕雷公訶電母應憐郡守老且愚欲把瘡

痕手摩撫山中歸時風色變中路已覺商羊舞夜牕騷

騷闌松竹朝畦泣泣流膏乳從來蝗旱必相資此事吾

聞老農語庶將積潤掃遺孽收拾豐歲還明主縣前已

害八千斛

公自注今春及今得蝗子八千餘斛

率以一升完一畝更看蠶

婦過初眠

公自注蠶一眠則蝗不復生矣

未用賀客來旁午先生筆力

吾所畏蹙

蹴

踏鮑謝跨徐庾偶然談笑得佳篇便恐流

傳成樂府陋邦一雨何足道吾君盛德九州普中和樂  
職幾時作試向諸生選何武

唐韻螻蝗子也左傳宣十五年冬螻生漢熙布傳上望  
布軍置陣如項籍軍上惡之僕綠字出莊子詳三卷次  
韻王誨夜坐詩注北史後秦有蝗蠶草木皆盡牛馬至  
相噉毛姚崇傳謂倪若水曰今坐觀蝗食苗忍而不救  
因以無年刺史其謂何詩小雅田祖有神秉畀炎火刺  
野食哉唐開元四年河南北蝗蠶為災敕遣使與州縣  
驅逐採得一石者與石粟一斗者粟亦如之掘坑埋之  
唐十道四番志密州常山齊時祈雨常應因以為名王  
充詩衛畫雷公左手引連鼓右手椎之續仙傳東王父  
與玉女投壺有不入者天為之笑則電後漢王郎傳元  
元瘡痍已過半矣家語童謡曰天將大雨商羊鼓舞五  
行志旱則魚螺變為蟲蝗漢霍光傳使者旁午注一縱

一橫為旁午宋鮑昭齊謝朓與徐陵庾信前後以詩文  
鳴於南朝前漢禮樂志武帝立樂府采詩夜誦有趙代  
秦楚之謳漢王褒傳益州刺史王褒欲宣風化於衆庶  
聞褒有俊材使作中和樂職宣布詩選好事者令依鹿  
鳴之聲習而歌之時記鄉侯何武為童子選在歌中久  
之武等學長安歌太學下轉而上聞宣帝召見武等觀  
之皆賜帛謂曰此盛德  
之事吾何足以當之

### 謝郡人田賀二生獻花

城裏田員外城西賀秀才不愁家四壁自有錦千堆珍  
重尤奇品艱難最後開芳心困落日薄艷戰輕雷

公自注昨

日雷  
雨  
老守仍多病壯懷先已灰殷勤此築者

公自注賀  
獻花三朵

攀折為誰哉玉腕揜紅袖金尊瀉白醅何當鑷霜鬢強  
插滿頭回

唐百官志太宗省內外官定制為七百二十員曰吾以  
此待天下賢材足矣然是時已有員外置漢賈誼傳河  
南守聞其秀才召致門下楊巨源省花詩一林堆錦映  
千燈詩國風三英粲今又見此粲者國語獸三為羣人  
三為衆女三為粲牡牧之醉題金鑷  
洗霜鬢又九日詩菊花須插滿頭歸

### 惜花

吉祥寺中錦千堆

公自注錢塘  
花最盛處

前年賞花真盛哉道人

勸我清明來腰鼓百面如春雷打徹涼州花自開沙河

塘上插花回醉倒不覺吳兒咍豈知如今雙鬢摧城西  
古寺沒蒿萊有僧閉門手自栽千枝萬葉巧剪裁就中  
一叢何所似馬腦槃盛金縷杯而我食菜方清齋對花  
不飲花應猜夜來雨雹如李梅紅殘綠暗吁可哀

公自注錢

塘吉祥寺花為第一壬子清明賞會最盛金盤綵藍以  
獻於座者五十三人夜歸沙河塘上觀者如山爾後無  
復繼也今年諸家園圃花亦極盛而龍興僧房一叢亦  
奇但衰病牢落自無以發興耳昨日雨雹如此花之盛  
者有幾可為嘆息也

南卓羯鼓錄明皇嘗遇二月初宿雨始晴景色明媚小  
殿亭內柳杏將吐歎曰對此景物豈可不與他判斷遣

高力士取羯鼓上臨軒縱擊一曲名春光好回顧柳杏  
皆坼上指笑謂嬪嬙曰此事不喚我作天公可乎唐裴  
行儉平都支遮蔔獲馬腦盤廣二尺杜  
子美詩內府殷紅馬腦盤春秋天雨雹

和頓教授見寄用除夜韻

我笑陶淵明種秫二頃半婦言既不用還有責子嘆無  
絃則無琴何必勞撫玩我笑劉伯倫醉髮蓬茆散二豪  
苦不納獨以鍤自伴既死何用埋此身同夜旦孰云二  
子賢自結兩重案笑人還自笑出口談治亂一生溷塵  
垢晚以道自盟無成空得懶坐此百事緩仄聞頓夫子

講道出新貫豈無一尺書恐不記庸懦

奴亂切

陋邦貧且

病數米銖稱炭慙愧章先生十日坐空館袖中出子詩

貪讀酒屢煖狂言各須慎勿使輸薪粲

淵明責子詩雖有五男兒總不好紙筆種秫無絃注並  
見前晉劉伶傳字伯倫嘗乘鹿車攜一壺酒使人荷鍤  
隨之謂曰死便埋我著酒德頌曰俯觀萬物擾擾焉若  
江海之載浮萍二豪侍側焉如蜾蠃之與螟蛉莊子大  
宗師死生命也其有夜旦之常天也傳燈錄據款結案  
又兩重公案皆禪宗語如此類甚多宗門公案有一千  
七百說文牘書版也長一尺為率莊子庚桑楚簡髮而  
櫛數米而炊稱炭用韋莊事詳四卷次韻柳子玉詩注  
晉孫盛傳嘗謁殷浩談論食冷而復煖者數四漢刑法  
志罪人獄已決定為城旦舂滿三歲為鬼薪白粲惠帝



紀註曰取薪給宗廟為鬼薪坐擇  
米使正白為白粲皆二歲刑也

### 和子由四首

#### 韓太祝送游太山

偶作郊原十日游未應回首厭籠囚  
但教塵土驅馳足終把雲山爛漫酬  
聞道逢春思濯錦便須到處覓菟裘  
恨君不上東封頂夜看金輪出九幽

蜀記錦城南有濯錦江左傳隱十一年公曰使營菟裘  
吾將老焉菟免都反史記封禪書武帝封禪上太山乃  
令人上石立之太山巔太山記東南峯名曰觀鷄一鳴  
見日出劉禹錫詩赤波千萬里湧出黃金輪黃庭經九

幽日月

洞空無

送春

夢裏青春可得追，欲將詩句絆餘暉。酒闌病客惟思睡，

蜜熟黃蜂亦懶飛。芍藥櫻桃俱掃地，

公自注：病過此二物。

鬢絲禪

榻兩忘機。憑君借取法界觀，一洗人間萬事非。

公自注：來書云。

近看此書余

未嘗見也。

白樂天禽蟲十二享，蠶老蠶成不庇身。蜂飢蜜熟屬他人，鬢絲禪榻注再見。華嚴經法界觀清涼澄觀禪師述以明華嚴大旨，杜子美送韓十四詩：歎息人間萬事非。

首夏官舍即事

安石榴花開最遲絳裙深樹出幽菲  
吾廬想見無限好  
客子倦游胡不歸  
坐上一樽雖得滿  
古來四事巧相違  
令人卻憶湖邊寺  
垂柳陰陰晝掩扉

張華博物志張騫使西域還得安石榴實子野酒諧扶  
風傳云頓遜國有安石榴取汁數日成美酒白樂天山  
石榴詩題詩報我何所云苦云色似石榴裙鄭谷子規  
詩春山無限好猶道不如歸詩國風式微式微胡不歸  
後漢孔融傳常嘆曰坐上客常滿樽中酒不空  
吾無憂矣四事用謝靈運擬鄴中詩序注已見

送李供備席上和李詩

家聲赫奕蓋并涼也解微吟錦瑟旁擘水取魚湖起浪  
引杯看劍坐生光風流別後人人憶才器歸來種種長  
不用更貪窮事業風騷分付與沈湘

漢中山靖王傳雍門子壹微吟古詩話李商隱有錦瑟  
詩云是令狐楚之青衣杜子美詩暫醉佳人錦瑟旁解  
退之詩擘水看蛟螭杜宴左氏  
莊詩檢書燒燭短看劍引杯長

### 西齋

西齋深且明中有六尺牀病夫朝睡足危坐覺日長昏  
昏既非醉踽踽亦非狂褰衣竹風下穆然中微涼起行

西園中草木含幽香榴花開一枝桑棗沃以光鳴鳩得  
美蔭因立忘飛翔黃鳥亦自喜新音變圓吭杖藜觀物  
化亦以觀我生

師莊切

萬物各得時我生日皇皇

晉賀循傳晉武賜循以六尺牀白樂天詩好是幽眠處  
松陰六尺牀又詩曰高睡足猶慵起危坐見管子弟子  
職篇詩國風獨行踽踽詩大雅吉甫作頌穆如清風宋  
玉九辯薄寒之中人詩國風桑之未落其葉沃若莊子  
山木篇觀一蟬方得美蔭而忘其身左太冲蜀都賦鴻  
儔鶴侶振鷺鸛胡雪飛水宿弄吭清渠莊子讓王篇原  
憲杖藜而應門齊物論周與胡蝶則必有分矣此之謂  
物化淮南子春女悲秋士哀而知物化周易觀我生進  
退未失道也劉禹錫賦觀物之餘遂觀我生陶潛歸去  
來善萬物之得時又寓形宇內復幾時曷不委心任去

留胡為皇皇欲何  
之揚子仲尼皇皇

### 小兒

小兒不識愁起坐牽我衣我欲嗔小兒老妻勸兒癡兒  
癡君更甚不樂愁何為還坐愧此言洗盞當我前大勝  
劉伶婦區區為酒錢

晉劉伶傳伶求酒於妻  
妻捐酒毀器涕泣諫之

### 寄劉孝叔

劉孝叔名述神宗時擢侍御史知雜  
數論事剴切會與王安石爭獄事不

合出知江州踰歲提舉崇禧觀東坡倅杭與  
孝叔會虎丘和其二詩載第九卷吳興六客

堂孝叔其一人也此詩首言征伐之意熙寧三年十一月詔京畿河北京東西路置三十  
七將將官遂與州郡長吏爭衡故云聯翩三  
十七將軍走馬西來各開府又立保甲法令  
諸州籍保甲聚民而教之禁令苛急往往去  
為盜郡縣不敢以聞故云保甲連村團未徧  
五年立方田均稅法詔司農以條約并式頒  
之天下歲以九月委令佐分地計量乃書戶  
帖連莊帳付之以為地符故云方田訟牒紛  
如雨七年呂惠卿建手實法使民自上其家  
之物產而官為注籍奉使者至析秋毫天下  
病之至八年十月乃罷故曰爾來手實降新  
書云云又曰平生學問止流俗是時安石凡  
議其新政者皆以流俗謂之也孝叔年七十  
二卒紹興間錄其  
風節贈祕閣修撰

君王有意誅驕鹵，椎破銅山鑄銅虎。聯翩三十七將軍，走馬西來各開府。南山伐木作車軸，東海取鼉漫戰鼓。

汗流奔走誰敢後，恐乏軍興汙資。

當作質

斧保甲連村團。

未遍方田訟牒紛如雨，爾來手實降新書。抉剔根株窮脉縷，詔書惻怛信深厚。吏能淺薄空勞苦，平生學問止流俗。衆裏笙竽誰比數，忽令獨奏鳳將雛。倉卒欲吹那得譜，况復連年苦饑饉。剝齧草木啖泥土，今年雨雪頗應時。又報蝗蟲生翅股，憂來洗盞欲強醉。寂寞虛齋卧。



空甌公厨十日不生烟更望紅裙踏筵舞故人屢寄山  
中信只有當歸無別語方將雀鼠偷太倉未肯衣冠挂  
神武吳興丈人真得道平日立朝非小補自從四方冠  
蓋鬧歸作二浙湖山主高蹤已自雜漁釣大隱何曾棄  
簪組去年相從殊未足問道已許談其粗一作祖逝將棄  
官往卒業俗緣未盡那得覩公家只在雲谿上有白  
雲如白羽應憐進退苦皇皇更把安心教初祖

三國志董卓傳志椎破銅山鐘簋漢文帝紀初與郡守  
為銅虎符注銅虎符第一至第五國家當發兵遣使者

至郡合符符合乃聽受之謝靈運詩金羈相馳逐聯翩  
何窮已柳子厚古東門行漢家三十六將軍東方雷動  
橫陣雲漢趙廣漢傳劾蘇賢為騎士屯霸上不詣屯所  
乏軍興衛按資斧資字當是質字之訛質與鑽通史記  
范雎傳臣之胸不足以當樞質而要不足以待斧鉞又  
一語無効請伏斧質又石慶傳罪當伏斧質又漢書梅  
福傳雖伏質橫分臣之願也諸本既譌資舊注因並作  
資斧解極無謂今正後漢馬嚴傳註劉徽九章算術曰  
方田第一晉王羲之傳文符如雨倒錯違背不可復知  
漢儒林傳文章爾雅訓辭深厚漢書司馬遷傳若望僕  
不相知而用流俗人之言注望怨也流俗謂隨俗人之  
言而流移其志又刑餘之人無所比數衆裏望等用東  
郭濫等事詳一卷將往終南詩注晉樂志鳳將雛者舊  
曲也韓退之感春詩艷姬踏筵舞清眸射劍戟鴝鵒雞  
語姜維詣諸葛亮與母相失後得母書令求當歸維曰  
但有遠志不在當歸許高建康實錄太史慈從孫策為

將曹公聞其名遺之書以篋封之發省無所道但貯當  
歸爾韓退之詩家請官供不報答無異雀鼠偷太倉挂  
冠大隱並已見前注漢楚元王傳遣子郢客與申公俱  
卒業莊子漁父篇孔子因請受業而卒業大道俗緣未  
盡用謝靈運語詳七卷汪潭秀才詩注雪谿注詳五卷  
贈孫革老安心注詳七卷病中遊祖塔院王注公烏臺  
詩案况復連年苦饑饉至更望紅裙踏筵舞供云近來  
饑荒飛蝗蔽天以譏朝廷行法事多闕失又言酒食無  
備公厨蕭索以譏諷朝廷減削公使錢太甚公  
事既冗旱蝗又甚貳政巨藩又如此窘迫耳

## 孔長源挽詩二首

孔長源名延世宣聖裔孫以  
進士第一嘉祐間知封州有

遺愛後知越州改宣州未至以為管勾三司  
理欠憑由司出知潤州未行卒長源言若不  
能出口及見義慷慨老益自強雖齟齬不以  
易意工於為文三子皆自教以學文仲武仲平

仲皆有傳國史為時名臣詩云不  
愧蔡邕碑者曾子固志其墓也

少年才氣冠當時晚節孤風益自奇君勝宜為夫子後  
林宗不愧蔡邕碑南荒尚記誅元惡東越誰能事細兒  
耆舊如今幾人在為君無憾為時悲

韓愈孔戣墓志銘孔世卅八吾見其孫按戣字君嚴弟  
戣字君勝後漢郭太傳太字林宗舉有道卒四方之士  
千餘人皆來會葬同志者乃共刻石立碑蔡邕為文既  
而謂涿郡盧植曰吾為碑銘多矣皆有慚德惟郭有道  
無愧色耳史記陳軫傳莊舄越之  
鄞細人韓退之詩魯連細兒點

小堰門頭柳繫船吳山堂上月侵筵潮聲半夜千巖響

詩句明朝萬口傳

公自注長源自越過杭夜飲有美堂上聯句長源云云天目遠隨雙鳳落

海門遥慶兩潮  
起一坐稱善

豈意日斜庚子後忽驚歲在己辰年

佳城一閉無窮事南望題詩淚灑牋

輿地志吳山本名胥山避伍相故改為吳山杜子美送  
韋二詩念我能書數字至將詩不必萬人傳漢賈誼傳  
為長沙傳有服飛入誼舍自傷悼以為壽不得長延為賦  
以自廣曰庚子曰斜服集余舍止於坐隅貌甚閒暇後  
漢鄭玄夢孔子告之曰起起今年歲在辰明年歲在巳  
既寤以識合之知命當終識曰歲在龍蛇賢人嗟西京  
雜記滕公嘗出東都馬忽悲鳴踣地不前使人掘地得  
石槨其上書云佳城鬱鬱三千年見白日吁嗟滕公居  
此室

寄呂穆仲寺丞

孤山寺下水侵門每到先看醉墨痕楚相未亡談笑是

中郎不見典刑存

公自注杭有伶人善學呂舉措酷似別後常令作之以為笑

君先

去踏塵埃陌我亦來尋桑棗村回首西湖真一夢灰心

霜鬢更休論

史記滑稽傳楚相孫叔敖死優孟為叔敖衣冠抵掌談笑王大驚以為叔敖復生也後漢孔融傳素與蔡邕善邕卒後有虎賁士貌類於邕融每酒酣引與同坐曰雖無老成人尚有典刑邕為左中郎將裴度中書即事詩灰心緣忍事霜鬢為論兵

余主簿母挽詩

閨庭蘭玉照鄉閭自昔雖貧樂有餘  
豈獨家人在中饋  
卻因麟趾識闕雎雲輶忽已歸  
仙府喬木依然擁舊廬  
忍把還鄉千斛淚一時灑向老萊裾

晉謝玄傳叔父安嘗曰子弟亦何預人事正欲使其佳  
玄曰譬如芝蘭玉樹欲其生於庭階耳周易家人在中  
饋貞吉詩小序麟  
之趾闕雎之應也

送趙寺丞寄陳海州

景疏樓上喚蛾眉君到應先誦此詩  
若見孟公投轄飲

莫忘衝雪送君時

景疏樓海州即東海郡為二疏之鄉故有景疏樓也又見九卷詩注漢陳遵字孟公投轄詳八卷和蘇州太守注詩

答陳述古二首

漫說山東第二州  
棗林桑泊負春游  
城西亦有紅千葉  
人老簪花卻自羞

小桃破萼未勝春  
羅綺叢中第一人  
聞道使君歸去後

舞衫歌扇總生塵

公自注陳有小妓述古稱之



樂府徐陵離曲舞衫回袖勝春風歌扇當牕似  
秋月劉越石答盧諶詩澄醪覆觴絲竹生塵

### 張安道樂全堂

列子御風殊不惡猶被莊生譏數數步兵飲酒中散琴  
於此得全非至樂樂全居士全於天維摩丈室空翛然  
平生痛飲今不飲無琴不獨今無絃我公天與英雄表  
龍章鳳姿照魚鳥但令端委坐廟堂北狄西戎談笑了  
如今老去苦思歸小字親書寄我詩試問樂全全底事  
無全何處更相虧

莊子逍遙游列子御風而行冷然善也旬有五日而後反彼於致福者未數數然也晉阮籍傳步兵厨營人善釀有貯酒三百斛乃求為步兵校尉晉魏之際天下多故由是不與世事酣飲為常入嵇康傳與魏宗室婚拜中散大夫常修養性服食之事彈琴詠詩自足於懷與山濤絕交書曰濁酒一杯彈琴一曲志意畢矣庾信詩步兵未飲酒中散未彈琴蕭索無真氣昏昏有俗心莊子至樂篇天下有至樂無有哉至樂無樂至樂無譽達生篇得全於酒猶若是而況得全於天乎維摩經長者維摩詰心念文殊師利與大眾俱來即以神力空其室內除去所有惟置一床世說王孝伯曰但使常得無事痛飲酒熟讀離騷便可稱名士晉陶潛蓄素琴一張絃徽不具每朋酒之會則撫而和之曰但識琴中趣何勞絃上聲晉嵇康傳康土木形骸不自藻飾人以為龍章鳳姿天質自然左傳哀七年吳太伯端委以治吳國語晉侯端委以入註云諸侯祭服也晉謝琨傳明帝在東

宮問鯢論者以君方庾亮自謂何如答曰端委廟堂使百僚準則鯢不如亮一丘一壑自謂過之杜子美詩談笑無河北又洗兵馬二三豪俊為時出整頓乾坤濟時了莊子繕性為樂全之謂得志古之所謂得志者非軒冕之謂也謂無以並其樂而已矣

### 張文裕挽詞

張文裕名揆舉進士知益都縣中丞范諷薦其材知萊州掖縣民訴

旱於州州不受文裕自為奏上之詔除登萊稅役歷官龍圖直學士戶部侍郎致仕卒年八十文裕齊州歷城人故有濟南名士句益都在劍外而文裕有惠政故有劍外生祠句

高才本出朝廷右能事空推德業餘每見便聞曹植句  
至今傳寶魏華書濟南名士新凋喪劍外生祠已潔除

欲寄西風兩行淚依然喬木鄭公廬

漢田叔傳上召與語漢廷臣無能出其右者周易天下之能事畢矣易繫辭可久則賢人之德可大則賢人之業三國魏陳思王植字子建善屬文杜子美詩文章曹植波瀾闊王注魏華河南人善書其字如褚河南而用筆開闊有豆盧公神道碑見於世又華為王徽之外孫善草隸書杜子美宴歷下亭詩海內此亭古濟南名士多又寄杜位詩封書兩行淚雪洒裏新詩白樂天寄劉蘇州詩何堪老淚交流日正是西風搖落時後漢鄭玄傳孔融深敬於玄告高密縣為玄特立一鄉曰鄭君好學實懷明德今鄭君鄉宜曰鄭公鄉廣開門衢令容高車號為通德門

懷西湖寄鼂美叔同年

鼂美叔名端彥時提點兩浙刑獄置司杭州

西湖天下景游者無愚賢淺深隨所得誰能識其全嗟  
我本狂直早為世所捐獨專山水樂付與寧非天三百  
六十寺幽尋遂窮年所至得其妙心知口難傳至今清  
夜夢耳目餘芳鮮君持使者節風采爍雲烟清流與碧  
巘安肯為君妍胡不屏騎從暫借僧榻眠讀我壁間詩  
清凉洗煩煎策杖無道路直造意所便應逢古漁父葦  
間自延緣問道若有得買魚勿論錢

歐陽公鎮陽園詩至今清夜夢猶繞北潭北漢霍光傳  
天下想聞其風采莊子漁父詳見七卷九日湖上尋周

李詩注杜子美詩白魚  
如切玉朱橘不論錢

和梅戶曹會獵鐵溝

山西從古說三明誰信儒冠也捍城竿上鯨鯢猶未掩

公自注近

草中狐兔不須驚東州趙叟

一作使

飲無敵南

梟數盜

國梅仙詩有聲不向如臯閒射雉歸來何以得卿卿

公自

注是日惟

梅趙不射

後漢段穎傳贊山西多猛三明儷蹤詳見九卷二公再和詩注  
左傳宣十二年古者明王伐不敬取其鯨鯢而封之以為大戮  
於是乎有京觀杜子美冬狩行草中狐兔盡何益天子不在咸  
陽宮左傳宣十二年趙使在後漢梅福傳隱吳市門卒至今人

以為仙左傳昭二十八年賈大夫惡娶妻而美三年不言  
不笑御以如皋射雉獲之其妻始笑而言卿卿注見四卷

### 祭常山回小獵

青蓋前頭點皂旗黃茅岡下出長圍  
弄風驕馬跑空立趁兔蒼鷹掠地飛  
回望白雲生翠巘歸來紅葉滿征衣  
聖明若用西涼簿白羽猶能效一揮

南史侯景作長圍圍梁宋書魏主就臧質求酒封洩便  
與之魏主怒築長圍一夕而合晉張重華傳重華據西  
涼用主簿謝艾為將軍進軍臨河麻狄以三萬衆距之艾  
乘輅車冠白帽鳴鼓而行秋望而怒曰艾年少書生冠  
服如此輕我也命黑獬龍驤三千人馳擊之左右大擾  
艾乃下車踞胡床指麾處分賊以為伏兵發懼不敢進

父乘勝奔擊大敗之晉顧榮傳陳敏之亂假榮丹陽內史榮與周玘等潛謀起兵攻敏榮發橋斂舟於南岸敏率萬餘人出不獲濟榮麾以白羽扇其衆潰散

和章七出守湖州二首

章惇字子厚

方丈仙人出渺茫高情猶愛水雲鄉功名誰使連三捷身世何緣得兩忘早歲歸休心共在他年相見話偏長只應未報君恩重清夢時時到玉堂

史記封禪書蓬萊方丈瀛州此三神山者相傳在渤海中詩小雅一月三捷白樂天詩性與時俱遠身將世兩忘陶淵明斜川詩吾生行歸休漢揚雄傳歷金門上玉堂有日矣李宗諤翰苑雜記太宗皇帝御書飛白玉堂



之署四字淳化三年賜  
今在本院玉堂門上

絳闕雲臺總有名應須極貴又長生  
鼎中龍虎黃金賤

松下龜蛇綠骨輕

公自注君好爐火而餌茯苓

雲水未渾纓可濯弁

峯初見眼應明兩巵春酒真堪羨  
獨占人間分外榮

晉傅玄西都賦巍巍絳闕續仙傳謝自然入海至一山  
遇道士曰天台司馬承禎身居赤城名在絳闕真良師  
也後漢朱景等傳贊顯宗追感前世功臣圖畫二十八  
將於南宮雲臺王注金丹之術有日兔月魄白虎青龍  
真鉛正汞蓋五行強名耳雲水并峯注並見五卷詩  
國風為此春酒以介眉壽時子厚二親無恙故云

# 和張子野見寄三絕句

過舊游

前生我已到杭州到處長如到舊游更欲洞霄為隱吏  
一菴閒地且相留

公答錢塘主簿陳師仲書云一歲率常四五夢至西湖  
上此殆世俗所謂前緣者在杭州嘗游壽聖院入門便  
悟曾到能言其院後堂殿山石處故詩中有前生已到  
之語杭州圖經洞霄宮在餘杭縣西南十八里唐大歷  
五年建為天柱觀祥符元年改  
今額杜子美詩隱吏逢梅福

見題壁

狂吟跌宕無風雅  
醉墨淋漓不整齊  
應為詩人一回顧

# 山僧未忍掃黃泥

小說有富家子杜四郎常戲為詩章號杜荀鵬以比荀鶴每有詩即題屋壁親賓或汙壞之即云三十年来塵撲面如今始得一枚泥

## 竹閣見憶

柏堂南畔竹如雲此閣何人是主人但遣先生披鶴氅  
不須重畫樂天真

世說孟昶家在京口嘗見王恭乘高輿披鶴氅裘於時微雪昶於籬間窺之歎曰此真神仙中人竹閣有樂天堂祠

和蔣夔寄茶

我生百事常隨緣四方水陸無不便扁舟渡江適吳越  
三年飲食窮芳鮮金齏玉膾飯炊雪海螯江柱初脫泉  
臨風飽食甘寢罷一甌花乳浮輕圓自從捨舟入東武  
沃野便到桑麻川翦毛胡羊大如馬誰記鹿角腥槃筵  
厨中烝粟埋飯甕大杓更取酸生涎柘羅銅碾棄不用  
脂麻白土須盆研故人猶作舊眼看謂我好尚如當年  
沙谿北苑強分別水脚一線爭誰先清詩兩幅寄千里

紫金百餅費萬錢吟哦烹噍兩奇絕只恐偷乞煩封纏  
老妻稚子不知愛一半已入薑鹽煎人生所遇無不可  
南北嗜好知誰賢死生禍福久不擇更論甘苦爭蚩妍  
知君窮旅不自釋因詩寄謝聊相鑄

大業拾遺吳郡獻松江鱸魚膾須八九月霜下之時鱸  
魚白如雪取三尺以下者作之以香菜花葉相間和以  
細縷金橙食之所謂金釐玉鱠東南之佳味也王注海  
螯言蟹江柱江瑤柱也韓退之簞詩倒身甘寢百疾愈  
劉禹錫茶詩欲知花乳清冷味須是眠雲跂石人漢地  
里志琅邪郡東武縣世說諸阮飲酒不復用常杯斟酌  
以大甕盛酒園坐相向大杓更飲之丁謂茶錄北苑里  
名官焙曰龍焙蓋造御茶也呂仲吉茶記壺源其別有

八沙谿其一也蔡君謨茶錄建安人鬪試以水痕先者為負故較勝負之說曰相去一水兩水王注蜀人以芝麻白土煎茶又鹽薑煎茶亦蜀中風味唐薛能茶詩鹽慎添長戒薑宜煮更誇

答李邦直

李邦直名清臣蚤以詞藻受知人主然志於利祿操持悻繆與鄧溫伯章惇諸人銳意紹述正人竄逐幾無噍類後追治其罪貶雷州司戶公守高密時邦直以京東提刑行部至密也東坡七年瘴海僅得生還推原禍本實自邦直發之云

美人如春風著物物未知羈愁似冰雪見子先流澌子從徐方來吏民舉熙熙扶病出見之驚我一何哀知我久慵倦起我以新詩詩詞如醇酒盎然熏四支徑飲不

覺醉欲和先昏疲西齋有蠻帳風雨夜紛披放懷語不  
擇撫掌笑脫頤別來今幾何春物已含姿柳色日夜暗  
子來竟何時徐方雖云樂東山禁游嬉又無狂太守何  
以解憂思聞子有賢婦華堂詠螽斯盍不倒囊索賣劍  
買蛾眉不用教絲竹唱我新歌詞

楚詞望美人兮未來東方朔七諫赴湘沅之流澌兮韻  
書漸流水也老子衆人熙熙如享太牢如登春臺漢匡  
衡傳諸儒語曰匡說詩解人頤注使人笑而不能止也  
詩小序螽斯后妃子孫衆多也按邦直再娶孫巨源女  
賢婦謂孫也劉禹錫楊柳枝詞請  
君莫奏前朝曲唱我新翻楊柳枝

施註蘇詩卷十





總校官庶吉士臣張能照

校對官編修臣楊壽楠

膳錄監生臣王錡

膳錄監生臣莫漢

欽定四庫全書薈要

集部

施註蘇詩卷十二

詳校官助教臣常循



欽定四庫全書薈要卷一萬四千九百六十二

集部

施註蘇詩卷十一

宋 蘇軾撰

宋 施元之註

武進邵長蘅刪補

詩六十六首

起守高密至得代歸京師卷中有除夜大雪留滄州元日早晴遂行之作

按公年譜除夜當是熙寧丙辰元日則丁巳元日也

和文與可洋川園池三十首

唐地理志洋州洋川郡武德元年析

梁州之西鄉黃金興勢置

湖橋

朱闌畫柱照湖明白葛烏紗曳履行橋下龜魚晚無數  
識君拄杖過橋聲

橫湖

貪看翠蓋擁紅妝不覺湖邊一夜霜卷卻天機雲錦段  
從教匹練寫秋光

古詩娥娥紅粉妝纖纖出素手宋玉高唐賦蜺為旌翠  
為蓋木玄虛海賦雲錦散文於沙汭之際韓退之曲江  
荷花詩撐舟昆明度雲錦腳敲兩  
舷叫吳歌謝玄暉詩澄江淨如練

# 書軒

雨昏石硯寒雲色風動牙籤亂葉聲庭下已生書帶草  
使君疑是鄭康成

韓退之詩鄴侯家多書插架三萬軸一一懸牙籤新若  
手未觸三齋紀略鄭康成居不其城南山中教授山下  
草如薤葉長尺餘  
人號康成書帶草

# 冰池

不嫌冰雪繞池看誰似詩人巧耐寒記取羲之洗硯處  
碧琉璃下黑蛟蟠

杜子美詩勝裏金花巧耐寒晉書王羲之傳嘗與人書云張芝臨池學書池水盡黑使人耽之若是未必後之也洗硯承天歸宗寺有右軍墨池

### 竹塢

晚節先生道轉孤歲寒惟有竹相娛麤才杜牧真堪笑  
喚作軍中十萬夫

白樂天答賈舍人詩一別承明三領郡從教人道是麤才北夢瑣言唐自大中以來以兵為戲廊廟之上恥言韜畧就有如盧藩薛能者目為麤材杜牧之賦竹林外裏兮十萬丈夫已見三卷次韻子由詩注

### 荻浦

雨折霜乾不耐秋  
白花黃葉使人愁  
月明小艇湖邊宿  
便是江南鸚鵡洲

九域志鄂州古迹有鸚鵡洲庾信詩春洲鸚鵡  
色流水桃花香李太白詩鸚鵡洲橫漢陽渡

### 蓼嶼

秋歸南浦蟪蛄鳴  
霜落橫湖沙水清  
卧雨幽花無限思  
抱叢寒蝶不勝情

家語孔子謂宰我曰遠山千里蟪蛄之聲猶  
在於耳江文通別賦送君南浦傷如之何

### 望雲樓

陰晴朝暮幾回新已向虛空付此身  
出本無心歸亦好  
白雲還似望雲人

華嚴經處世界如虛空如蓮花不著  
水陶淵明歸去來辭雲無心以出岫

天漢臺

漾水東流舊見經銀潢左界上通靈  
此臺試向天文覓  
閣道中間第幾星

尚書端冢導漾東流為漢謝希逸月賦斜漢左界北陸  
南躔漢天文志天一紫宮後十七星絕漢抵營室曰閣  
道



待月臺

月與高人本有期，挂簷低戶映蛾眉。  
只從昨夜十分滿，漸覺冰輪出海遲。

二樂榭

此間真趣豈容談，二樂并君已是三。  
仁智更煩訶妄見，

坐令魯叟作瞿曇。

公自注來詩云  
二見因妄生

瀟泉亭

聞道池亭勝兩川，應須爛醉荅雲烟。  
勸君多揀長腰米，

消破亭中萬斛泉

杜子美詩爛醉是生涯李賀憶昌谷  
山居詩長鑄江米熟小樹棗花香

吏隱亭

吏隱出汝南先  
賢傳鄭欽事

縱橫憂患滿人間頗怪先生日日閒  
昨夜清風眠北牖朝來爽氣在西山

霜筠亭

解籜新篁不自持嬋娟已有歲寒姿  
要看凜凜霜前意須待秋風粉落時

無言亭

殷勤稽首維摩詰敢問如何是法門彈指未終千偈了  
向人還道本無言

露香亭

亭下佳人錦繡衣滿身瓔珞綴明璣晚香消歇無尋處  
花已飄零露已晞

西域記西域國人首冠花縵身衣  
瓔珞詩小雅湛湛露斯匪陽不晞

涵虛亭

水軒花榭兩爭妍  
秋月春風各自偏  
惟有此亭無一物  
坐觀萬景得天全

谿光亭

決去湖波尚有情  
卻隨初日動簷楹  
谿光自古無人畫  
憑仗新詩與寫成

古詩話詩人以畫為  
無聲詩詩為有聲畫

過谿亭

身輕步穩去忘歸  
四柱亭前野竹微  
忽悟過谿還一笑

# 水禽驚落翠毛衣

爾雅略豹獨木橋也廬山記遠公與陶元亮陸修靜談道不覺過虎溪因相與大笑故世傳三笑圖

## 披錦亭

烟紅露綠曉風香  
燕舞鶯啼春日長  
誰道使君貧且老  
繡屏錦帳咽笙簧

## 禊亭

曲池流水細鱗鱗  
高會傳觴似洛濱  
紅粉翠娥應不要  
畫船來往勝於人

何遜下方山詩鱗鱗水逆去彌瀾急還舟晉東晉傳武帝問三日曲水之義暫曰昔周公城洛邑因流水以泛酒故逸詩云羽觴隨波又秦昭王以三日置酒河曲見金人奉水心之劍曰令君制有西夏乃霸諸侯因此立為曲水二漢相承皆為盛集

### 菡萏亭

日日移床趁下風清香不盡思何窮若為化作龜千歲  
巢向田田亂葉中

史記龜策傳有神龜在江南嘉林中常巢於芳蓮之上抱朴子千歲龜巢於蓮葉或在叢蓍之下樂府江南曲江南可採蓮蓮葉何田田

茶蘼洞

長憶故山寒食夜野茶蘼發暗香來分無素手簪羅髻

且折霜蕤浸玉醅

長憶故山一作半雨半晴

篋簾谷

異物志篋簾生水邊長數尺圍一尺五六寸一節相去六七寸廬陵界有

之始興以南尤多

漢川修竹賤如蓬斤斧何曾赦籜龍料得清貧饒太守  
渭川千畝在胸中

公有文與可畫篋簾谷偃竹記云與可與其妻游谷中燒笋晚食發函得

此詩失笑

噴飯滿案

盧仝寄男詩竹林吾最惜新筍好看守萬籜抱龍兒攢  
迸溢林藪吾眼恨不見心腸痛如搗籜龍正稱冤莫殺  
入汝口丁寧囑付汝汝活籜龍否史記  
貨殖傳渭川千畝竹其人與千戶侯等

### 寒蘆港

溶溶晴港漾春暉蘆筍生時柳絮飛還有江南風物否

桃花流水鱖

徂禮切

魚肥

張志和漁父詞西塞山頭白鳥飛桃花流水鱖魚肥  
永衡記黃河二月三月水名桃花水韻注鱖刀魚也

### 野人廬

少年辛苦事犁鋤剛厭青山遶故居老覺華堂無意味



卻須時到野人廬

此君菴

寄語菴前抱節君與君到處合相親  
寫真雖是文夫子我亦真堂作記人

杜子美丹青引必逢佳士亦寫真王注名竹為抱節君先生新語也與可畫竹名之曰墨君有堂焉先生作墨

君堂

記

香橙徑

金橙縱復里人知不見鱸魚價自低  
須是松江煙雨裏

小船燒薤擣香齋

王注鱸魚所以為膾金橙所以為齋松江之鱸江南所稱也此為金齋玉膾又詳卷十和蔣夔寄茶詩注

南園

不種夭桃與綠楊使君應欲候農桑  
春畦雨過羅紋膩  
夏壠風來餅餌香

北園

漢水巴山樂有餘一麾從此首歸塗  
北園草木憑君問  
許我他年作主無

顏延年五君詠屢薦不入官一麾乃出守  
杜牧之將赴吳興詩擬把一麾江海去

寄題刁景純藏春塢

白首歸來種萬松待看千尺舞霜風年拋造物陶甄外  
春在先生杖履中楊柳長齊低戶暗櫻桃爛熟滴堦紅  
何時卻與徐元直共訪襄陽龐德公

景純藏春塢前有岡皆種松公有詩云為君栽插萬松  
岡白樂天夢游春詩門柳暗全低簷櫻紅半熟襄陽記  
龐德公居峴山之南未嘗入城府諸葛孔明每至德公  
家獨拜牀下德公初不令止司馬德操嘗詣德公值其  
上冢德操徑入其室呼德公妻子使速作黍徐元直向  
云當來就我與德公談其妻子皆羅拜堂下奔走共設

須臾德公還直入相  
就不知何者是客也

玉盤盂二首

并序

東武舊俗每歲四月大會于南禪資福兩寺以芍  
藥供佛而今歲最盛凡七千餘朵皆重跗累萼繁  
麗豐碩中有白花正圓如覆盂其下十餘葉稍大  
承之如槃資格絕異獨出于七千朵之上云得之  
於城北蘇氏園中周宰相公之別業也而其名  
俚甚乃為易之

雜花狼籍占春餘  
芍藥開時掃地無  
兩寺妝成寶璫珞  
一枝爭看玉盤盂  
佳名會作新翻曲  
絕品難尋舊畫圖  
從此定知年穀熟  
姑山親見雪肌膚

莊子逍遙游藐姑射之山神人居焉肌膚若冰雪綽約若處子其神凝使物不疵癘而年穀熟

花不能言意可知  
令君痛飲更無疑  
但持白酒勸嘉客  
直待瓊舟覆玉彝  
負郭相君初擇地  
看羊屬國首吟詩  
吾家豈與花相厚  
更問殘芳有幾枝

周禮六彝皆有舟六彝謂鷩彝鳥彝斚彝黃彝虎彝蜼彝注舟所以薦彝如今之承盤也負郭看羊俱用蘇氏

事

和潞公超然臺

我公厭富貴常苦勲業尋相期赤松子永望白雲岑清  
風出談笑萬竅為號吟吟成超然詩洗我蓬之心嗟我  
本何人麋鹿強冠襟身微空志大交淺屢言深囑公如  
得謝呼我幸寄音但恐酒錢盡煩公揮橐金

漢張良傳注赤松子仙人號神農時為雨師事見劉向  
列仙傳詩大雅穆如清風再見莊子齊物論作則萬竅  
怒號逍遙游夫子猶有蓬之心也夫張景陽詠史揮金  
樂當年歲暮不留儲杜子美戲簡鄭廣文賴有蘇司業

時時與酒錢漢書陸賈傳出所  
使越橐中裝賣千金分具子

### 聞喬太博換左藏知欽州以詩招飲

今年果起故將軍幽夢清詩信有神  
馬革裹屍真細事  
虎頭食肉更何人  
陣雲冷壓黃茅瘴  
羽扇斜揮白葛巾  
痛飲從今有幾日  
西軒月色夜來新

公先有鐵溝行贈喬云今年定起故將軍故此云果且  
曰信有神也杜子美詩醉裏從為客詩成覺有神後漢  
馬援傳男兒要當死於邊野以馬革裹屍還葬耳何能  
卧牀上在兒女子手中耶班超傳相者曰燕頤虎頭飛  
而食肉此萬里侯相也史記天官書陣雲如立垣再見  
通真子瘴論嶺南從仲春訖仲夏行青草瘴季夏訖孟

冬行黃茅瘴蜀諸葛亮與司馬宣王對於渭濱王  
戎服蒞事使人視亮乘素車葛中羽扇指揮三軍

喬將行烹鵝鹿出刀劍以飲客以詩戲之

破匣哀鳴出素虯倦看鷓鴣聽啾啾明朝只恐兼烹鶴  
此去還須卻佩牛便可先呼報恩子不妨仍帶醉鄉侯  
他年萬騎歸應好奈有移文在故丘

雲谿友議韋鵬翼題盱眙邵明府壁云自從煮鶴燒琴  
後背卻青山卧明月佩牛用漢龔遂事注見前韓退之  
送石處士詩忽騎將軍馬自號報恩子唐王績撰醉鄉  
記以配劉伶酒德頌皮日休詩他年謁帝言何事請贈  
劉伶作醉侯孔稚珪北山移文引云周彦倫先隱北山  
後出為海鹽令欲還山稚珪乃假山靈之意作文移之



次韻劉貢父李公擇見寄二首

白髮相望兩故人  
眼看時事幾番新  
曲無和者應思郢

論少卑之且借秦  
歲惡詩人無好話

公自注公擇來詩皆道吳中饑苦之

事

夜長鰥守向誰親

公自注貢父近喪妻

少思多睡無如我鼻息

雷鳴撼四鄰

宋玉對楚王問客有歌於郢中者云云其曲彌高其和彌寡漢張釋之傳釋之言便宜事文帝曰卑之無甚高論令今可行於是言秦漢間事漢賈山傳言治亂之道借秦為喻名曰至言李賀詩沙路歸來無好語旱火不

光天

下雨

何人勸我此間來  
絃管生衣甌有埃  
綠蟻濡脣無百斛  
蝗蟲撲面已三回  
磨刀入谷追窮寇  
灑涕循城拾棄孩  
為郡鮮歡君莫歎  
猶勝塵土走章臺

甌埃用後漢范丹甌中生塵事已見七卷注謝玄暉詩  
嘉魴聊可薦綠蟻方獨持史記秦始皇紀後贊餐未及  
下咽酒未及濡唇漢張敞傳敞守京兆尹稱職然無威  
儀時罷會過走馬章臺街公烏臺詩案時朝廷新法減  
削公使錢及造酒不得百石致管絃生衣甌釜生埃及  
言蝗蟲災傷盜賊四起旱澇饑謹以見政事闕失皆新  
法不便之故

# 寄黎眉州

黎眉州名錡字希聲蜀人志林云希聲治春秋有家法然為人質木遲緩

劉貢父戲為黎檬子黎以為指其德不知檬子真是木也一日聯騎出市人有鬻之者大笑幾落馬今吾謫海南所居有此木霜實累累然二君皆入鬼錄坐念故友之風味豈可復得劉固不泯於世黎亦能文字不苟隨者

膠西高處望西川應在孤雲落照邊瓦屋寒堆春後雪

峨眉翠掃雨餘天治經方笑春秋學好士今無六一賢

公自注君以春秋受知歐陽文忠公公自號六一居士且待淵明賦歸去共將詩

## 酒趁流年

韓退之寄盧仝詩春秋三傳束高閣獨抱遺經究終始按王介甫素不喜春秋目為斷爛朝報時介甫方得志

故云治經方笑春秋學公為眉人  
黎方守眉故有淵明歸去之句

和趙郎中捕蝗見寄

趙郎中成伯時以  
尚書郎倅密州

麥穗人許長穀苗牛可沒天公獨何意忍使蝗蟲發驅  
攘著令典農事安可忽我僕既胼胝我馬亦款矻飛騰  
漸云少筋力亦已竭苟無百篇詩何以醒睡兀初如疏  
畎澮漸若決澌渤往來供十吏腕脫不容歇平生輕妄  
庸熟視笑魏勃愛君有逸氣詩壇專斬伐民病何時休  
吏職不可越慎無及世事向空書吐吐

韓退之稻畦詩魚肥知已秀鶴沒覺初深尚書瘡眈澹  
距川漢旌俠傳陳遵為河南太守至官召書吏十人治  
私書謝京師故人遵馮几口占書數百封唐王勣傳為  
鳳閣舍人壽春等五王出閣有司具儀忘載冊文羣臣  
已在方悟其闕勵召五吏執筆分占其辭粲然唐蘇頌  
傳為中書舍人時書詔填委口所占授輕重無所差書  
吏白曰馬公徐之不然手腕脫矣漢高五王傳灌嬰聞  
魏勃本教齊王反使使召責問勃勃退立股戰而栗恐  
不能言者灌將軍熟視笑曰人謂魏勃勇妄庸人耳漢  
宣帝紀吏或越職踰法以取名譽晉殷浩傳雖被放黜  
口無怨言但終日書  
空作吐吐怪事四字

### 登常山絕頂廣麗亭

西望穆陵關東望琅琊臺南望九仙山北望空飛埃相

將叫虞舜遂欲歸蓬萊嗟我二三子狂飲亦荒哉紅裙  
欲仙去長笛有餘哀清歌入雲霄妙舞纖腰回自從有  
此山白石封蒼苔何嘗有此樂將去復徘徊人生如朝  
露白髮日夜催棄置當何言萬劫終飛灰

史記齊世家昔召康公命我先君曰東至海西至河南  
至穆陵北至無棣王注穆陵山在沂水縣琅琊山在沂  
水朐山諸城三縣界始皇嘗登山樂之作琅琊臺地在  
今諸城東南又九仙山在錢塘臨安或云在密州諸城  
縣杜子美慈恩塔詩回首叫虞舜蒼梧雲正愁盧仝詩  
蓬萊山在何處玉川子乘此清風欲歸去趙飛燕外傳  
帝嘗與后坐瀛洲榭后歌歸風送遠之曲帝以文犀筋  
擊玉甌令后所愛侍郎馬無方吹笙以倚后歌中流歌

酣風大起后揚袖曰仙乎仙乎去故而就新順風揚音  
無方長喻細擲與相屬帝曰無方為我持后遽捨笙持  
后履久之風霽后泣曰帝恩我使我仙去不得悵然泣  
數行下他日宮姝或縷帶為絢號留仙帶又飛燕舞腰  
宛轉若流風之回雪晉羊祐傳登峴山顧謂鄒湛等曰  
自有宇宙便有此山由來賢達勝士登此遠望如我與  
卿者多矣然湮滅無聞使人悲傷如百歲後有知魂  
魄猶應登此山也刳灰見七卷金門寺中絕句詩注

### 薄薄酒二首

并序

膠西先生趙明叔家貧好飲不擇酒而醉常云薄  
薄酒勝茶湯醜醜婦勝空房其言雖俚而近乎達  
故推而廣之以補東州之樂府既又以為未也復

自和一篇聊以發覽者之一噓云耳

薄薄酒勝茶湯麤麤布勝無裳醜妻惡妾勝空房五更  
待漏鞞滿霜不如三伏日高睡足北牕涼珠襦玉柙萬  
人相送歸北邙不如懸鶉百結獨坐負朝陽生前富貴  
死後文章百年瞬息萬世忙夷齊盜跖俱亡羊不如眼  
前一醉是非憂樂兩都忘

西京雜記漢制諸陵皆珠襦玉匣形如鎧甲以金縷之  
張景陽七哀詩北邙何累累高陵有四五借問誰家墳  
皆云漢世主王注子夏衣若懸鶉董京衣百結宋國有  
田夫嘗衣縕縢自曝於日顧其妻曰負日之暄人莫知



將獻之於吾君莊子駢拇篇臧與穀二人牧羊而俱亡其羊問臧則挾策讀書問穀則博塞以遊二人事業不同其於亡羊均也伯夷死名於首陽之下盜跖死利於東陵之上二人所死不同其於殘生傷性均也

薄薄酒飲兩鍾麤麤布著兩重美惡雖異醉暖同醜妻惡妾壽乃公隱居求志義之從本不計較東華塵土北牕風百年雖長要有終富死未必輸生窮但恐珠玉留君容千載不朽遭樊崇文章自足欺盲聾誰使一朝富貴面發紅達人自達酒何功世間是非憂樂本來空

應璩古樂府道上逢三叟何以得此壽中叟前致詞室內妻妾醜漢高祖紀幾敗乃公事東華塵前輩戲語有

西湖風月不如東華軟紅香土北牕風見前註漢王莽傳赤眉樊崇等入關燒長安宮室為墟宗廟園陵皆發掘惟霸陵杜陵完文帝霸陵宣帝杜陵後漢劉盆子傳赤眉發掘諸陵凡有玉柙斂者率皆如生故遂多行淫穢古樂府今日牛羊上丘隴當時近前面發紅白樂天嘗作酒功贊

同年王中甫挽詞

王中甫名介三衢人中嘉祐六年直言極諫科東坡入三

等中甫四等為秘書丞知靜海縣除秘閣校勘熙寧初介甫被召不復辭中甫寄詩曰草廬三顧動幽蟄蕙帳一空生曉寒盖有所誼介甫後賦詩云丈夫出處非無意猿鶴從來自不知為中甫發也介甫既得政神宗轉對羣臣中甫進疏云願陛下師心勿師人帝納之以喻介甫且以奏疏示之介甫不樂深聞其言會考開封試與劉貢父言語往復御史

劾之罷判鼓院歸館知湖州去郡卒官止祠部郎中

先帝親收十五人

公自注仁宗朝賢良十五人今惟富鄭公張宣徽錢純老及余與舍弟在耳

四方爭看擊鵬鷃如君事業真堪用顧我衰遲不足論  
出處升沉十年後死生契闊幾人存他時京口尋遺迹  
宿草猶應有淚痕

詩國風死生契闊與子成說杜子

美詩他時一笑後今日幾人存

七月五日二首

法令所載尋醫為去官入務乃任理詩中所用蓋出此

避謗詩尋醫畏病酒入務蕭條北牕下長日誰與度今

年苦炎熱草木困薰煮况我早衰人幽居氣如縷秋來  
有佳興秫稻已含露還復此微吟往和糟牀注

唐陸贄傳避謗不著書晉顧榮傳謂張翰曰惟酒可以  
忘憂但無如作病何王注詩尋醫謂不作詩也酒入務  
謂止酒不飲也杜子美詩流汗卧江亭更深  
氣如縷又羌村詩預知秫稻收已覺糟牀注

何處覓新秋蕭然北臺上秋來未云幾風日已清亮雲  
間聳孤翠林表浮遠漲新棗漸堪剥晚瓜猶可餉西風  
送落日萬竅含悽愴念當急行樂白髮不汝放

詩國風八月剥棗萬竅注三見漢楊惲傳人生行  
樂耳須富貴何時杜子美詩苦遭白髮不相放

趙郎中見和戲復答之

趙子吟詩如潑水一揮三百八十字奈何效我欲尋醫  
恰似西施藏白地趙子飲酒如淋灰一年十萬八千杯  
若不令君早入務飲竭東海生黃埃我哀臨政多繆錯  
羨君精采如秋鶚頗哀老子令日飲為君坐嘯主畫諾  
韓退之寄崔立之詩文如翻水成初不用意為白樂天  
簡簡吟十三行坐事調品不肯迷頭白地藏李太白震  
陽歌云百年三萬六千日一日須傾三百杯若以歲計  
則當十萬八千杯矣神仙傳麻姑云海中行復揚塵鮑  
照燕城賦直視千里外惟見起黃埃北夢瑣言符載為  
劉闢真贊云靈螭出水秋鶚乘風後漢馬援傳援為隴

西太守任吏以職但總大體而已諸曹吏白外事輒曰  
此丞掾之任何足相煩頗哀老子使得遨遊若大姓侵  
小民黠羌欲拒旅此太守事耳前漢袁盎傳絲能日飲  
亡何詳四卷和劉道原詠史詩注後漢黨錮傳汝南太  
守竇資任功曹范滂南陽太守成瑨亦委功曹岑暕二  
郡為誣曰汝南太守范滂孟博南陽竇資主畫諾南陽太  
守岑公孝弘農  
成瑨但坐嘯

### 次韻周邠寄鴈蕩山圖二首

周邠字開祖錢塘人東坡倅杭三年

與開祖數從湖山之游見於酬唱故云西湖  
三載與君同是時開祖為樂清令鴈蕩山實  
在境內

指點先憑採藥翁丹青化出大槐宮  
眼明小閣浮烟翠

齒冷新詩嚼雪風二華行觀雄陝右九仙今已壓京東

公自注將赴河中密通太華九仙在東武奇秀不減鴈蕩也

此生的有尋山分已覺

## 溫台落手中

山志鴈蕩山在溫州樂清縣天下奇秀自古圖牒不記祥符中方有人見之按西域書阿羅漢諾詎羅居震旦東南際大海鴈蕩山芙蓉龍湫唐貫休為諾詎羅贊有鴈蕩經行雲漠漠龍湫宴坐雨濛濛句此山南有芙蓉峰下有芙蓉驛前臨大海未知鴈蕩龍湫所在後因伐木見山頂有大池相傳以為鴈蕩下有二潭以為龍湫云經行峽宴坐峰則後人因貫休詩名之者後漢龐公常入鹿門山采藥不返異聞集淳于棼醉夢二紫衣吏召棼曰大槐安國王致命以為南柯太守及覺尋其所經由乃宅南大槐下蟻穴耳張平子西京賦綴以二華

注大華少華也杜子美將適吳  
楚詩不意青草湖扁舟落吾手

西湖三載與君同馬入塵埃鶴入籠東海獨來看日出  
石橋先去踏長虹遙知別後添華髮時向樽前說病翁  
所恨蜀山君未見他年攜手醉郾筒

齊地記秦始皇作石橋欲過海看日出處有神能驅石  
下海石去不速神輒鞭之石皆流血山志天台山石橋  
廣不盈尺長數十丈下臨絕澗渡得平路上有瓊樓玉  
闕碧林醴泉瑶草神奇莫可名狀舊稱金庭洞天華陽  
風俗錄郾人剡竹為筒釀酒筒中閉以藕絲包以蕉葉  
信宿香達於外然後斷之俗號郾筒酒成都記郾縣因  
水得名杜子美詩  
酒憶郾筒不用沽



送碧香酒與趙明叔教授

趙明叔教授膠西人

聞君有婦賢且廉勸君慎勿為楚相不羨紫駝分御食  
自遣赤腳沽村釀嗟君老狂不知愧更吟醜婦惡嘲謗  
諸生聞語定失笑冬暖號寒卧無帳碧香近出帝子家  
鵝兒破殼酥流盎不學劉伶獨自飲一壺往助齊眉餉

史記滑稽傳優孟為叔敖衣冠抵掌談語歲餘像孫叔敖莊王置酒優孟前為壽王大驚欲以為相優孟曰請歸與婦計之三日後復來曰婦言慎無為楚相不足為也如孫叔敖盡忠為廉以治楚今死其子無立錫之地必如叔敖不如自殺於是莊王謝優孟召叔敖子封之寢丘又互見十卷寄呂穆仲詩注杜子美麗人行紫駝

之峰出翠釜又御厨絲絡送八珍韓退之寄盧仝詩一  
奴長鬢不裹頭一婢赤腳老無齒又進學解冬暖而兒  
號寒年豐而妻啼饑碧香都尉王詵家釀也楚辭屈原  
九歌帝子降兮北渚註帝子謂堯女娥皇女英也鵝兒  
用杜子美詩已見前注晉劉伶傳伶求酒於妻妻涕泣  
諫曰君酒太過必宜斷之伶曰善吾不能自禁惟當祝  
鬼神自誓便可具酒肉妻從之伶跪祝曰天生劉伶以  
酒為名一飲一斛五斗解醒婦兒之言慎勿可聽仍引  
酒御肉塊然復醉又見十卷小兒詩注後漢梁鴻  
傳其妻孟光為具食不敢於鴻前仰視舉案齊眉

趙既見和復次韻答之

長安小吏天所放日夜歌呼和丞相豈知後世有阿瞞

公自注曹公  
自言參之後

北海樽前捉私釀先生未出禁酒國詩語

孤高常近謗幾回無酒欲沽君卻畏有司書簿帳

公自注近

制公使酒過數法甚重

酸寒可笑分一斗日飲亡何足袁盎更將

險語壓袁翁只恐自是臺無餉

莊子馬蹏篇一而不黨命曰天放漢曹參相舍歌呼已見四卷再和詩注後漢孔融傳曹操以年饑兵興表制酒禁融頻書爭之多侮慢之辭融嘗為北海相阿瞞操小字唐王績傳待詔門下省故事官給酒日三升或問待詔何樂答曰良醞可應耳侍中陳叔達聞之日給一斗時稱斗酒學士漢袁盎注再見

趙郎中往莒縣逾月而歸復以一壺遺之仍用

前韻

東鄰主人游不歸悲歌夜夜聞春相門前人鬧馬嘶急  
一家喜氣如春釀王事何曾怨獨賢室人豈忍交謫謗  
大兒踉蹌越門限小兒咿啞語繡帳定教舞袖掣伊涼  
更想夜庖鳴甕盎題詩送酒君勿謂免使退之嘲一餉

曲禮春不相史記商君傳童子不歌謠春者不相杵詩  
小雅我從事獨賢又國風我入自外室人交徧謫我韓  
退之贈張籍詩有兒雖甚憐教示不免簡君來好呼出  
踉蹌越門限漢東方朔傳伊優啞者辭未定也韓退之  
醉贈張祕書詩長安衆富兒盤饌羅羶葷不解  
文字飲惟能醉紅裙雖得一餉樂有如聚飛蚊

# 蘇潛聖挽詞

蘇潛聖名泳成都新繁人舉進士  
知乾州邛州官至職方郎中致仕

其子名際亦登

第終著作郎

妙齡馳譽百夫雄晚節忘懷大隱中  
悃悃無華真漢吏文章爾雅稱吾宗  
趨時肯負平生志有子還應不死同  
惟我閒思十年事數行老淚寄西風

後漢章帝紀元和二年詔曰安靜之吏悃悃無華杜子美詩出門搔白首苦負平生志左傳昭六年季平子曰子服氏有子哉三國吳張溫傳孫權問公卿曰溫當今與誰為比顧雍曰當今無輩權曰如是張允不死也

和鼂同年九日見寄

仰看鸞鵠刺天飛富貴功名老不思  
病馬已無千里志

騷人長負一秋悲古來重九皆如此別後西湖付與誰  
遣子窮愁天有意吳中山水要清詩

韓退之祭柳子厚文一斤不復羣飛刺天晉王敦傳每  
酒後輒詠魏武樂府曰老驥伏櫪志在千里烈士暮年  
壯心不已楚辭宋玉九辨悲哉秋之為氣也又皇天平  
分四時兮竊獨悲此凜秋杜牧之九日詩古往今來只  
如此牛山何必淚沾衣白樂天讀李  
杜集詩天意君須會人間要好詩

送喬施州

王注喬叙字禹功嘗以太博換  
左藏知欽州其後除知施州

恨無負郭田二頃空有載行書五車江上青山橫絕壁  
雲間細路躡飛蛇雞號黑暗通蠻貨蜂鬧黃連採蜜花

共怪河南門下客不應萬里向長沙

公自注喬受知於吳丞相而施州風

土大類

長沙

負郭田注再見前莊子惠施多方其書五車酉陽雜俎波斯人謂牙為白暗犀為黑暗抱朴子通天犀有一白理如線者以盛米置羣雞中雞往啄至輒驚卻故南人名曰駭雞犀也本草南中有蜜色黃味苦蜂銜黃連花之作

雪夜獨宿柏仙菴

晚雨纖纖變玉霏小菴高卧有餘清夢驚忽有穿牕片  
夜靜惟聞瀉竹聲稍壓冬溫聊得健未濡秋旱若為耕

天公用意真難會又作春風爛漫

一作晴

韓退之詩庶纖晚雨不能晴韓詩外傳雪花曰霰謝惠連雪賦始緣薨而冒棟終開簾而入隙杜荀鶴雪詩巖谷惟聞折竹聲李太白答丁十一詩待得明朝酒醒罷與君爛熳尋春暉

和孔郎中荆林馬上見寄

孔宗翰字周翰宣聖五十世孫與東坡密

州為代未至以此詩先之

秋禾不滿眼宿麥種亦稀永愧此邦人芒刺在膚肌平生五千卷一字不救飢方將怨無襦忽復歌緇衣堂堂孔北海直氣凜羣兒朱輪未及郊清風已先馳何以累



君子十萬貧與羸  
滔滔滿四方我行竟安之何時劍關  
路春山聞子規

漢書食貨志董仲舒曰願詔大司農使關中益種宿麥  
霍光傳若有芒刺在背北史崔儼傳大署其戶曰不噴  
五千卷書者無得入此室三國遺錄魏文帝云文為當  
代所宗讀書五千卷許登閣觀書登者才六人後漢  
范傳為蜀郡太守百姓歌之曰平生無襦今五絳詩小  
序緇衣美武公也後漢孔融傳融字文舉為北海相韓  
退之詩不知羣兒愚那用故謗傷後漢輿服志中二千  
石二千石皆皂蓋朱兩轡其千石六百石朱左轡九域  
志劍門關  
隸利州路

留別雩泉

公雩泉記常山西南有泉乃琢石為井作亭其上而名之曰雩泉古者謂

吁嗟而求  
雨曰雩

舉酒屬雩泉白髮日夜新何時泉中天復照泉上人二  
年飲泉水魚鳥亦相親還將弄泉手遮日向西秦

世說晉簡文入華林園顧謂左右曰會心處不必在遠  
翳然林水便自有濠濮間想也覺鳥獸禽魚自來親人  
壯牧之途中絕句惆悵江湖  
釣竿手卻遮西日向長安

留別釋迦院牡丹呈趙倅

春風小院卻

一作初

來時壁間惟見使君詩應問使君何

處去憑花說與春風知年年歲歲何窮已花似今年人

老矣去年崔護若重來前度劉郎在千里

本事傳博陵崔護清明日游都城南從居人家求飲扣門久之有女子以杯水至獨倚小桃佇立意屬殊厚明年復往門巷如故而扃鑰寂然因題詩左扉曰人面不知何處所桃花依舊笑東風劉郎用劉禹錫句注再見

董儲郎中嘗知眉州與先人游過安丘訪其故

居見其子希甫留詩屋壁

白髮郎潛舊使君至今人道最能文隻雞敢忘橋公語

下馬來尋董相墳冬月負薪雖

一作那

得免鄰人吹笛不

堪聞死生契闊君休問灑淚西南向白雲

漢武帝至郎署見一郎眉鬚皓白問何時為郎對曰臣  
姓顏名駟以文帝時為郎文帝好文而臣好武景帝好  
老臣尚少陛下好少臣已老是以三葉不遇上感其言  
擢為會稽都尉張衡賦龐眉而郎潛今逮三葉而邁武  
後漢橋玄傳魏武祭橋文云士死知己懷此無忘又承  
從容約誓之言徂歿之後路有經由不以斗酒隻雞過  
相沃酹車過三步腹痛勿怨按三國魏太祖紀徂歿作  
殂逝勿怨作勿怪國史補董仲舒墳在長安門人過必  
下馬故號下馬陵而語訛為蝦蟇陵史記滑稽傳孫叔  
敖死其子窮困負薪向子期思舊賦序余少與嵇康呂  
安居止接近其後各以事見法逝將西邁經其舊廬于  
時日薄虞淵冰寒淒然鄰人有吹笛者發聲寥亮追思  
曩昔游燕之好感昔而歎故作賦云杜  
子美懷舊詩老罷知明鏡悲來望白雲

劉貢父見予歌詞數首以詩見戲聊次其韻

十載飄

一作漂

然未可期那堪重作看花詩門前惡語誰

傳去醉後狂歌自不知刺舌君今猶未戒炙眉吾亦更

何辭相從痛飲無餘事正是春容最好時

杜牧之詩十載飄然繩檢外隋書賀若弼父敦臨刑呼  
弼謂曰吾以舌死汝不可不思因引錐刺弼舌戒以謹  
口晉郭舒為王澄別駕荆上士人宗廟嘗因酒忤澄怒  
叱左右棒廐舒厲色謂左右曰使君過醉汝輩何敢妄  
動澄恚曰別駕狂邪因遣搯其鼻炙其眉舒跪而受之  
廐遂得免杜子美醉時歌忘形到爾汝痛飲真吾師

除夜大雪留澠州元日早晴遂行中途雪復作

除夜雪相留元日晴相送東風吹宿酒瘦馬兀殘夢蔥

曉光開旋轉餘花弄下馬成野酌佳哉誰與共須臾  
晚雲合亂灑無缺空鵝毛垂馬駿自怪騎白鳳三年東  
方旱逃戶連欹棟老農釋耒嘆淚入饑腸痛春雪雖云  
晚春麥猶可種敢怨行役勞助爾歌飯糗

劉駕早行詩馬上兀殘夢馬嘶時復驚白樂天詩門前  
雪片似鵝毛曹唐游仙詩不知今夜游何處侍從皆騎  
白鳳凰農諺霜凇打

霜凇窮漢餒飯糗

大雪青州道上有懷東武園亭寄孔周翰

超然臺上雪城郭山川兩奇絕海風吹碎碧琉璃時見

三山白銀闕蓋公堂前雪綠牕朱戶相明滅堂中美人  
雪爭妍粲然一笑玉齒頰就中山堂雪更奇青松怪石  
亂瓊絲惟有使君游不歸五更上馬愁斂眉君不見淮  
西李侍中夜入蔡州縛取吳元濟又不見襄陽孟浩然  
長安道上騎驢吟雪詩何當閉門一作戶飲美酒無人毀  
譽河東守

杜子美詩天地黯慘忽異色波濤萬頃堆琉璃史記封  
禪書三神山其物禽獸盡白金銀為宮闕唐李愬討吳  
元濟會大雪夜入蔡城黎明禽元濟檻送京師王注或  
問鄭縈詩思對曰詩思在灞橋雪中驢背上又浩然有

長安道中雪詩史記季布為河東守孝文時人有言其  
賢召欲以為御史大夫夫人又言其勇使酒難近至留邸  
一月見罷布進曰陛下以一人譽台臣以一人毀去臣臣恐天下有識者有以窺陛下也

至濟南李公擇以詩相迎次其韻二首

公擇知湖州東

坡以杭倅來會今自高密官滿過濟南而公擇復為守在焉

弊裘羸馬古河濱野闊天低糝玉塵自笑餐鹽典屬國  
來看換酒謫仙人宦游到處身如寄農事何時手自親  
剗作新詩與君和莫因風雨廢鳴晨

何遜詠雪詩時逐微風起誰言非玉塵餐鹽漢蘇武事  
武還至京師拜典屬國注已見前撫言賀知章一見李



白呼為謫仙人因解金龜換酒為樂詩國風風雨如晦  
雞鳴不已杜子美催樹鷄欄詩不昧風雨晨亂離減憂  
慶

夜擁笙歌雪水濱回頭樂事總成塵今年送汝作太守  
到處逢君是主人聚散細思都是夢身名漸覺兩非親  
相從繼燭何須問蝙蝠飛時日正晨

送人作守羅友事見三卷送呂希道詩注老子名與身  
孰親左傳莊二十二年飲齊桓公酒樂公曰以火繼之  
蝙蝠注已  
見七卷

和孔君亮郎中見贈

偶對先生盡一樽  
醉看萬物洶崩奔  
優游共我聊卒歲  
骭髀如君合倚門  
只恐掉頭難久住  
應須傾蓋便深論  
固知嚴勝風流在  
又見長身十世孫

公自注 嚴字君嚴  
弟戡字君勝 退之

志其墓云 孔世卅八 吾見其孫  
白而長身 今君亮四十八 世矣

謝靈運入彭蠡詩 圻岸屢崩奔 史記孔子世家 優哉游  
哉 維以卒歲 骭髀倚門 用趙壹句 詳見七卷 明日重九

詩  
注

施註蘇詩卷十一